



Սույն գիրքը թվայնացվել է Գրքասեր ՀԿ-ում՝ հայերենով գրականության պահպանման, հանրայնացման և ժամանակակից թվային միջավայրում հասանելի դարձնելու նպատակով:

Կազմակերպության նախաձեռնությունը միտված է հայերեն գրքերի և տեքստերի տարածմանը, ընթերցանության խթանմանը և մշակութային ոչ կոմերցիոն ժառանգության պահպանությանը՝ ապահովելով դրանց հասանելիությունը հնարավորինս լայն շրջանակների համար:

Մենք հավատում ենք, որ թվայնացումը ոչ միայն պահպանման միջոց է, այլև գիտելիքի, գրականության և մշակույթի շարունակական փոխանցման կարևոր ուղի:

Գրքասեր ՀԿ-ն գրքերը ձայնագրում և թվայնացնում է բացառապես Ձեր նվիրատվությունների շնորհիվ: Կազմակերպությանը կարող եք օժանդակել հետևյալ հղումով՝

<https://grqaser.org/hy/donate>

Ստուգված

Հայ գրականություն, Թատերգություն
13+

Շիրվանզադե

Եվգինե

դրամա 3 գործողությամբ

Նվիրվում է
դերասան ՅՈՎՀԱՆՆԵՍ ԱԲԵԼՅԱՆԻՆ

Գործող անձիք

ՄԻՀՐԱՆ ԱԼԱՎԵՐԴՅԱՆ, քաղաքում հայտնի փաստաբան, 35 տարեկան

ԵՎԳԻՆԵ ԱԼԱՎԵՐԴՅԱՆ, Նրա կինը, 24 տարեկան

ՀՈՒՓՍԻՄԵ ՄԻՐՎԵԼՅԱՆ, Եվգինեի մայրը, 50 տարեկան այրի:

ՄԱՐԹԱ ՏԵՐՏԵՐՅԱՆ, Միհրանի քույրը, 38 տարեկան այրի: Նախկին վարժուհի:

ՀԱՄԱԶԱՍՊ ԿԱՐՍԱՄՅԱՆ, Միհրանի մորեղբոր որդին և օգնականը, 28 տարեկան:

ԱՐԳԱՐ ՍՈՒԼԹԱՆՅԱՆ, ինժեներ-տեխնոլոգ, գործարանատեր: Միհրանի բարեկամն ու հասակակիցը:

ԱՐՇԱԿ ՍԱՐԱՖՅԱՆ, Եվգինեի մորեղբոր որդին: Նախկին սպա, այժմ անգործ, 36 տարեկան:

ԳԱՐԲՈ ԱԶԱՐՅԱՆ, 36 տարեկան:

ԳԱԼԱՄԲԱՐՅԱՆ ՉԱՐՈՒՀԻ, 40 տարեկան:

ԳԱԼԱՍՔԱՐՅԱՆ ԲԱՐՍԵՂ, 52 տարեկան:

ԵՐՄՈՆԵ, Ալավերդյանների աղախինը:

Գրագիր.

Գործողությունը կատարվում է նահանգական մեծ քաղաքում:

Արարված Ա.

Բեմը ներկայացնում է Ալավերդյանների բավական հարուստ զարդարված հյուրասենյակը: Դեպի ձախ երկու դուռ — խորքինը տանում է սեղանատուն, ավանսցենայի կողքինը — Եվգինեի ննջարանը: Այս երկու դռների միջև դրված է թախտ թանկագին մուգաքաներով ու բարձերով: Խորքում նույնպես երկու դուռ, որոնցից ձախինը տանում է դեպի ննջասենյակ, աջինը՝ դեպի Միհրանի առանձնասենյակ: Աջ պատի վրա լուսամուտներ դեպի փողոց: Աջ պատի տակ դրված է դաշնամուր, մոտը մի սեղան, վրեն գեղարվեստական իրեր, լուսանկարներ դիտակով հանդերձ: Սեղանի մոտ բարձր պատվանդանով բրոնզյա լամպար ահագին մետաքսյա լուսամուտով: Խորքի երկու դռների միջին ուղղությամբ բեմի մեջտեղում դրված է գահավորակ, շրջապատված շքեղ բազկաթոռներով: Աջ կողմում մի օրորվող բազկաթոռ (качалка): Ամենուրեք սենյակի ազատ և հարմար անկյուններում փոքրիկ, ցածր փափուկ նստարաններ: Պատերին կախված են յուղանկարներ և գրավյուրներ: Առհասարակ ամբողջ կահ-կարասին կրում է նոր ձեռք բերված հարստության դրոշմ: Ամեն ինչ նոր է ու ժամանակակից: Երեկոյան 8 ժամն է: Սենյակը լուսավորվում է գահավորակի առջև սեղանի վրա դրած և դաշնամուրի մոտ գտնվող բրոնզյա լամպարներով:

Տեսիլ 1

ՏԻԿ. ՄԱՐԹԱ և ԵՐՄՈՆԵ

Վարագույրը բարձրանալիս Երմոնեն անձեռոցիկով մաքրում է բազկաթոռները, իսկ Տիկին Մարթան բրոնզյա լամպարի մոտ նստած կարդում է ինչ — ոչ գիրք.

ՏԻԿ. ՄԱՐԹԱ. Շուտ արա, գործդ վերջացրու, ուր ժամից անց է, սամովարը կուշանա:

ԵՐՄՈՆԵ. Իսկի էլ չի ուշանա:

ՏԻԿ. ՄԱՐԹԱ. Էլի հակառակեցի՞ր, ախար հայ ես է:

ԵՐՄՈՆԵ. Հայն ի՞նչ է որ...

ՏԻԿ. ՄԱՐԹԱ. Հայը գոռոզ է, կոպիտ է, հակաճառող:

ԵՐՄՈՆԵ. Իսկի էլ հակաճառող չէ:

ՏԻԿ. ՄԱՐԹԱ. (Ժպտալով) Դե լավ, գնա սամովարի հոգս տես, թե չէ կբարկանամ:

ԵՐՄՈՆԵ. Իսկի էլ չես բարկանա, գնում եմ: (Գնում է ձախ կողմի խորքի դռներով սեղանատուն: Ձախ թևի ավանսցենայի կողմի դռներից, ննջարանից դուրս է գալիս Եվգինեն):

ՏԵՍԻԼ 2

ՏԻԿ. ՄԱՐԹԱ. Երեխան քնե՞ց:

ԵՎԳԻՆԵ. Վերջապես քնեց (Նստում է դաշնամուրի մոտ երեսը դեպի Մարթան: Լռություն):
Տեր աստված, ինչքան տխուր է առանց Միհրանի:

ՏԻԿ. ՄԱՐԹԱ. (Գիրքը ծալելով և ծնկան վրա դնելով) Մի կես ժամ ուշացավ, Էլի տխրեցի՞ր:
Ախ, սիրահարներ, սիրահարներ, շուտով ձեր ամուսնության տասնևչորս ամիսը կլրանա, Էլի
կարծես, երեկ եք պսակվել: Այդպես չի կարելի, մի քիչ պակասեցրեք ձեր կրակը: (Ժպտում է):

ԵՎԳԻՆԵ. Միթե ուրա՞խ չես, որ եղբայրդ սիրվում է:

ՏԻԿ. ՄԱՐԹԱ. Ընդհակառակը: Քեզ լավ հայտնի է, թե որքան թանկ է ինձ համար Միհրանի
բախտավորությունը: Սիրիր նրան, Եվգինե, նա հազվագյուտ մարդ է:

ԵՎԳԻՆԵ. Այժմ ես նրան ճանաչում եմ ավելի, քան դու:

ՏԻԿ. ՄԱՐԹԱ. Ա՞յո: Կնշանակե գիտես, եթե նրան վշտացնես — կոժժախտանա:

ԵՎԳԻՆԵ. (հառաչելով) Ինչո՞ւ պիտի վշտանամ, քանի որ սիրում եմ:

ՏԻԿ. ՄԱՐԹԱ. Իսկ նա քեզ ուղղակի պաշտում է: Նա չի Էլ կարող ուրիշ կերպ սիրել: Նրա
բնավորությունն անխառն է, հաստատ և, այսպես ասած, ամբողջ: Այդ տեսակ մարդիկ, երբ
սիրում են, սիրում են անկեղծ, խորը և անվերջ սիրով: Բայց շողոքորթություն չհամարես, դու
Էլ նրա նման ես: Դուք երկուքդ, իմ կարծիքով, միևնույն բնավորության տեր եք: Չարմանալի
է, որ ասում են, թե միայն կոնտրաստներն են միմյանց սիրում:

ԵՎԳԻՆԵ. Չգիտե՞մ, կա իմ մեջ նրա արժանավորություններից որևէ մեկը, թե չէ, գիտեմ, որ
ոչ միան սիրում եմ նրան, այլև հարգում: Նա այն մարդն է, որին վաղուց ստեղծել էր
երևակայությունս և որին ես ուշ ճանաչեցի: Հարգում եմ նրա սրտի պարզությունը, խելքի
կորովը, կամքի ուժը: Այո, նա զորեղ կամքի տեր է: Միմիայն յուր խելքին է պարտական այն
դիրքը, որ նա ունի մեր քաղաքի հարյուրավոր փաստաբանների մեջ: (Վեր է կենում ու
շրջում):

ՏԻԿ. ՄԱՐԹԱ. Արի այդ խոսքերիդ համար քեզ համբուրեմ: (Վեր է կենում ու համբուրում):
Այդ կարծիքը պատիվ է բերում քեզ, Եվգինե: Նշանակում է, որ դու երախտագետ ես, իսկ
երախտագիտությունը մեր ժամանակներում մեծ արժանիք է: Եվ ինչպե՞ս չլինել
երախտագետ: Հակառակ ընդհանուր ախտի, նա չհափշտակվեց ոչ օժիտով, և ոչ կապերով
և շատ հարսնացուների մեջ քեզ ընտրեց. քեզ, որ համարյա ոչինչ չունեիր, բացի անձնական
արժանապատվությունից: (Նստում է և նայելով Եվգինեին ժպտում): Միայն իմացիր, եթե մի
օր դու նրան վշտացնես, կատեմ քեզ: Իսկ դու գիտես, թե որքան եմ ատում, երբ ատում եմ:

ԵՎԳԻՆԵ. (Նայում է աչքերին, աշխատելով ժպտալ): Գիտեմ... աչքերդ արտահայտում են:
(Երմունեն ներս է մտնում լրագրերը ձեռքին):

ԵՐՄՈՆԵ. (Տալով լրագրերը Տիկ. Մարթային) Խանջալովների աղախինը բերեց:

ՏԻԿ. ՄԱՐԹԱ. Այո, այո, ես էի խնդրել: (Կանգնելով լամպարի մոտ, շտապով բաց է անում
համարներից մեկը ու նայում): Այն է որ կա:

ԵՎԳԻՆԵ. Այդ ի՞նչ է:

ՏԻԿ. ՄԱՐԹԱ. Արաբաջյանի ինքնասպանության գործի հաշիվը: (Եվգինեն ցնցվում է):

ԵՐՄՈՆԵ. Խնդրել է, որ եզուց առավոտ հետ ուղարկեք:

ՏԻԿ. ՄԱՐԹԱ. Ասա լավ: Ուրեմն այս երեկո պիտի կարդալ: Բայց ոչ հիմա, շաբաթ երեկո է, երևի հյուրեր կգան:

ԵՎԳԻՆԵ. Այդտեղ ամբողջ գործն է տպված:

ՏԻԿ. ՄԱՐԹԱ. Չգիտեմ, ինձ հետաքրքրում է մամուլի կարծիքը:

ԵՎԳԻՆԵ. (Խլելով լրագրերը) Տուր ինձ, ես ուզում եմ կարդալ:

ՏԻԿ. ՄԱՐԹԱ. (Չարմացած) Ինչո՞ւ այդպես խլեցիր: Ուզում ես — միասին կարդանք:

ԵՎԳԻՆԵ. Ոչ, ոչ, առանձին-առանձին ... (Ուզում է գնալ):

ՏԻԿ. ՄԱՐԹԱ. Ո՞ր ես գնում:

ԵՎԳԻՆԵ. Իմ ննջարանը՝ կարդալու:

ՏԻԿ. ՄԱՐԹԱ. Ինչո՞ւ ես այդպես շտապում:

ԵՎԳԻՆԵ. (Շփոթվելով) Ոչինչ, հենց այնպես: (Չանգակի ձայն): Ահ, հյուր է գալիս: Դու զբաղեցրու, ես իսկույն... (Գնում է նույն դռներով, որտեղից եկել էր):

ՏԻԿ. ՄԱՐԹԱ. (Նայում է նրա հետևից զարմացած):

ՏԵՍԻԼ 3

ՏԻԿ. ՄԱՐԹԱ և ՍԱՌԱՓՅԱՆ

ՍԱՌԱՓՅԱՆ. (Ներս մտնում ֆրակով: Նա մի փոքր հարբած էր, բայց իրան պահում էր խիստ կանոնավոր): Քույր Մարթա, ամենախորի՞ն հարգանքներս...

ՏԻԿ. ՄԱՐԹԱ. Հըմ, էլի քեփո՞ լավ եմ տեսնում: Այդ ո՞րտեղից:

ՍԱՌԱՓՅԱՆ. Բուրժուական ճաշից եմ գալիս: (Ընկղմելով օրորվող բազկաթոռի վրա): Ներեցեք, քույր Մարթա, այս բազկաթոռը նպաստում է մարսողության: Միրզաջանովների տանն էի, իրանց փեսացվի ծնողներին ճաշ էին տալիս: Է՛հ, քույր Մարթա, մեր հասարակությունը լուսավորվել է: Այժմ պահանջում են, որ ֆրակով գնանք ճաշի: Տասնուհինգ տարվա մեջ Միրզաջանովների տրեխները փոխվել են փայլուն կոշիկների, փափախը — ցիլինդրի, չոփսան — ֆրակի:

(Հանելով ժիլետի գրպանից մի սիգար): Կարելի՞ է: (Մարթան գլխով նշան է անում , նստելով բազկաթոռներից մեկի վրա): Մերսի՛: Այո, այո մեծ հառաջադիմության մեջ է մեր ազգը: Պարոն Միրզաջանովը դեռ չի սովորել կերակուրը պատառաքաղով ուտել, լակեյին պարոն է ասում . տիկին Միրզաջանովն ասում է. աղջիկս կադը — պատր է սովորում, տղաս վալանչել է ածում: Հայերեն արժանի չի համարում խոսելու: Մի խոսքով շիլա — փլավ:

ՏԻԿ. ՄԱՐԹԱ. Ճաշը երկա՞ր տևեց:

ՍԱՌԱՓՅԱՆ. Այո: Հետո երիտասարդները նստեցին բակարա խաղալու, ես մի փոքր մտիկ արի, սիրտս պղտորվեմ, փող չունեի, որ բախտս փորձեմ: Քույր Մարթա, տխուր է, շատ տխուր:

ՏԻԿ. ՄԱՐԹԱ. Ամուսնացե՞ք...

ՍԱՌԱՓՅԱՆ. (Շուռ տալով ժիլետի դատարկ գրպանները): Սրանցով: Մինչև անգամ ժամացույց էլ չունիմ, գրավ եմ դրել հյուրանոցի տիրոջ մոտ:

ՏԻԿ. ՄԱՐԹԱ. Ինչո՞ւ չեք ծառայում:

ՍԱՌԱՓՅԱՆ. Ով է պաշտոն տալիս, որ ծառայեմ: Ինձ հրավիրում են ճաշերի, ընթրիքների, երեկոյթների, հյուրասիրում են Ռեդերերի շամպանիայով, Հանրի Կլեյնի կամ Ումպարի սիգարներով, իսկ պաշտոն չեն տալիս:

ՏԻԿ. ՄԱՐԹԱ. Երևի, անընդունակ են համարում:

ՍԱՌԱՓՅԱՆ. Անընդունա՞կ: Ես մի ամբողջ ռոտա եմ կառավարել, մի քոստ Բադդասարի կամ Մաթևոսի կոնտորա չե՞մ կարող: (Շրջում է): Ոչ այդ չէ, քույր Մարթա, ընդունակ եմ, բայց լռել չգիտեմ: Օ՛, լռելու արհեստը շողոքորթելու արհեստից լ շահավետ է: Ես ճանաչում եմ մարդիկ, որոնք համարվում են խելոք, որովհետև գիտեն լռել և խորհրդավոր կերպով իրանց քիթը քորել: Քիթն քորելն երևի տաղանդ է: (Մարթան ծիծաղում է): Բայց դուք ծիծաղում եք, (զանգի ձայն)ձեզ հետ լուրջ խոսել չի կարելի: Ահա, հյուրեր: Գրագ կգամ, որ Գալամբարյաններն են: Ով լինի-չլինի, նրանք ամեն շաբաթ երեկո այստեղ են: (Ներս են մտնում տիկին և պարոն Գալամբարյանները: Կիսը հագնված է շքեղ, մարդը հնամաշ սյուրտուկով է): Տեսաք Ռոմեոն և Ջուլիետտա:

ՆՐԱՆՔ և ԳԱԼԱՄԲԱՐՅԱՆՆԵՐ, հետո ԵՎԳԵՆԵ.

ՏԻԿ. ԳԱԼԱՄԲԱՐՅԱՆ. (Բարևելով, իսկ Մարթայի հետ համբուրվելով) Ա՛խ, Մարթա, եթե իմանաս ինչքան հոգնած եմ, կցավես: (Նստում է): Այսօր երեք նիստ եմ ունեցել, չորրորդն էլ բաց եմ թողել: Ամբողջ քաղաքն էլ չափչփել եմ: Անիծվի՛ր այսպես քաղաքը, մի հատ բնակարան չեմ գտնում խեղճ տաճկահայ որբերի համար:

ՏԻԿ. ՄԱՐԹԱ. Էլի որբեր:

ՏԻԿ. ԳԱԼԱՄԲԱՐՅԱՆ. Այո, այո, էլ մի՛ ասա:

Պ. ԳԱԼԱՄԲԱՐՅԱՆ. (Նստում է սյուրտուկի փեշերը զգուշությամբ հետ քաշելով): Լո՛խ էլ եկել են մեր գլխին թափվել: (Ժպտում է):

ՍԱՌԱՓՅԱՆ. Լո՛խ, (Մարթան հանդիմանաբար նայում է Սառափյանին):

Պ. ԳԱԼԱՄԲԱՐՅԱՆ. Ըմբո, փռակդ նոր ըմ տեսնում, Էդ հինչ տեղ... (Ժպտում է):

ՍԱՌԱՓՅԱՆ. (Սիգարի ծուխը հրճվանքով արձակելով գլխից վեր) Տենցևայնի վեչեր ըմ քինիլական... (Մարթան, հագիվ ծիծաղը զսպելով, դարձյալ հանդիմանաբար նայում է նրան):

ՏԻԿ. ԳԱԼԱՄԲԱՐՅԱՆ. Բայց ո՞րտեղ է տիկին Եվգինեն:

ՏԻԿ. ՄԱՐԹԱ. Մի քիչ զբաղված է:

ՏԻԿ. ԳԱԼԱՄԲԱՐՅԱՆ. Երևի տնտեսությամբ: Ա՛խ, երանի նրան: Հավատացնում եմ, ճաշելու ժամանակ չունիմ այդ տաճկահայերի ձեռքից:

Պ. ԳԱԼԱՄԲԱՐՅԱՆ. Էլ, տալուց նըղացանք, աղպեր, օզըմըն հա՛ օզըմ...

ՍԱՌԱՓՅԱՆ. Շատ ըն օզում: (Մարթան դարձյալ հանդիմանաբար նայում է նրան):

ՏԻԿ. ԳԱԼԱՄԲԱՐՅԱՆ. Չկարծես, Մարթա, որ այսօր հյուր եմ եկել: Ձերոնց հետ գործ ունիմ: Ա՛խ, գլուխս տրաքում է, չգիտեմ որն անեմ կամ որի մասին մտածեմ:

Պ. ԳԱԼԱՄԲԱՐՅԱՆ. Չորն ասեմ, զորը խոտովանեմ (Ծիծաղում է հազալով):

ՍԱՌԱՓՅԱՆ. Շատ դժվար է գործիչ կանանց դրույթունը:

Պ. ԳԱԼԱՍՔԱՐՅԱՆ. Ասում ըմ, ձեռ եկալ ասկի գործերից, օղուշաղովդ պերապիր. օճըմ չի... (ժպտում է):

ՏԻԿ. ԳԱԼԱՍՔԱՐՅԱՆ. Բարսեղ, մարդ մենակ իր համար չպիտի ապրի: Այսօրվա օրն ամբողջ քաղաքում ես եմ մենակ մնացել ու մեկ էլ տիկին Պամպադուրյանը, մյուսները հեռացել են ասպարեզից: Այժմ բոլոր հույսերս տիկին Եվգինյեի վրա է: Մենք վճռել ենք նրան էլ լծի տակ քաշել: Երիտասարդ, խելոք, զարգացած. նա շատ օգտակար կլինի հասարակության համար: Ննջարանի դռներից դուրս է գալիս Եվգինյեն գունատ և հուզված): Ահա՛ և ինքը: (Համբուրվում է Եվգինյեի հետ): Ես որ չգամ ձեր տուն, դուք իսկի չեք էլ հարցնիլ մեռած եմ, թե՛ կենդանի:

ՍԱՌԱՓՅԱՆ. (Առանձին): Այդ մեկը Հուդայի համբույր էր:

ԵՎԳԻՆԵ. (Բարևելով մյուս հյուրերին) Ներեցեք, այս քանի օրերս տկար էի, թե չէ — վաղուց էի պատրաստվում ձեզ այցելելու:

ՏԻԿ. ԳԱԼԱՍՔԱՐՅԱՆ. Տկար եք, Դուք այժմ էլ, կարծես, առողջ չեք. դուք գունատ եք, մինչև անգամ դողում եք:

ՏԻԿ. ՄԱՐԹԱ. Տիկինը ճիշտ է ասում, Եվգինյե, դու գունատ ես: Ի՞նչ պատահեց:

ԵՎԳԻՆԵ. (Տիկ. Գալամբարյանի խորհրդավոր շփոթված) Ե՛ս... ճշմարիտ... ոչինչ. (Աշխատում է ժպտալ): Գլուխս մի քիչ պտտում է, սիրտս բաբախում:

ՏԻԿ. ԳԱԼԱՍՔԱՐՅԱՆ. Արյան սակավությունից կլինի, այո, դրանից կարող է մարդու գլուխը պտտել: (Նայում է իր ամուսնուն խորհրդավոր):

ԵՎԳԻՆԵ. Ոչինչ, անցավ, նստեցեք խնդրեմ: (Նստում են): Էհ, ասացեք, տիկին, ինչ նորություն, ինչով եք զբաղված.

ՏԻԿ. ԳԱԼԱՍՔԱՐՅԱՆ. Միթե տիկին Գալամբարյանին հարցնել կարելի է, թե ինչով է զբաղված: Հենց հիմա այդ մասին էի գանգատվում: Ձեզ մոտ էլ գործով եմ եկել:

ԵՎԳԻՆԵ. Հրամայեցեք:

ՏԻԿ. ԳԱԼԱՍՔԱՐՅԱՆ. Մի նոր ընկերություն ենք կազմել, դուք էլ պիտի անդամ գրվեք:

ՍԱՌԱՓՅԱՆ. Ընկերություն՝ ընկերական ոգին սպանելու համար — ահա բոլոր հայ ընկերությունների նպատակը:

ՏԻԿ. ԳԱԼԱՍՔԱՐՅԱՆ. Դուք ամեն լուրջ բան կատակ եք դարձնում, պարոն ՍԱՌԱՓՅԱՆ:

Պ. ԳԱԼԱՍՔԱՐՅԱՆ. Կիրափառ ըս խոսքւմ, Սռափով:

ՏԻԿ. ԳԱԼԱՍՔԱՐՅԱՆ. (Եվգինյեին) Իսկապես, ես սխալ ասացի, ընկերություն չէ, այլ շատ մոտիկ ծանոթներից մի փոքրիկ շրջան:

ԵՎԳԻՆԵ. Նպատակը:

ՏԻԿ. ԳԱԼԱՍՔԱՐՅԱՆ. Աղքատ հարսնացուներին օժիտ տալ:

ՍԱՌԱՓՅԱՆ. Պարոն Բարսեղ, շնորհավորում եմ:

Պ. ԳԱԼԱՍՔԱՐՅԱՆ. Խիի՞...

ՍԱՌԱՓՅԱՆ. Նոր ընկերությունը ձեր մագազինի փտած ապրանքները կնաղդացնի:
(Մարթան թաքուն ծիծաղում է):

Պ. ԳԱԼԱՍՔԱՐՅԱՆ. Ըմբռ, ես հիբի եմ փտած ապրանք ծախալ...

ՏԻԿ. ԳԱԼԱՍՔԱՐՅԱՆ. (Եվգինեն) Հուսով եմ, որ չեք մերժիլ: Անդամավճարը միանվագ երկու հարյուր ռուբլի:

ԵՎԳԻՆԵ. Զգիտեմ: Ամուսնուցս կհարցնեմ, հետո պատասխան կտամ:

ՏԻԿ. ԳԱԼԱՍՔԱՐՅԱՆ, Ձեր ամուսնոց: Այդ ի՞նչ ասել է — խոնարհություն, սեր, թե երկյուղ:

ԵՎԳԻՆԵ. Ոչ մեկը, կամ գուցե երեքն էլ միասին:

ՏԻԿ. ՄԱՐԹԱ. Կեցցե՛ս, Եվգինե:

Պ. ԳԱԼԱՍՔԱՐՅԱՆ. Լսում ես, Չարուհի, խոնարհություն, սեր, երկյուղ, իրեքն էլ միասին, լյավ պեն ա հա՛ ա:

ՏԻԿ. ԳԱԼԱՍՔԱՐՅԱՆ. Խոնարհությունն ու երկյուղը դեն գցեք, տիկին, սերը պահեցեք, որովհետև մենք քսաներորդ դարի սկզբումն ենք ապրում:

ՍԱՌԱՓՅԱՆ. Բրա՛վո, ազգը մեծ առաջադիմության մեջ է... (Տիկ. Գալամբարյանը Սառափյանի վրա ատելության հայացք է ձգում):

ՏԻԿ. ՄԱՐԹԱ. Ով սիրում է, նա պետք է խոնարհվի և վախենա: Խոնարհվի սիրելուց, վախենա՝ սիրուց զրկվելուց:

Պ. ԳԱԼԱՍՔԱՐՅԱՆ. Մի քիչ խրթին էր, ամա քեփս կկավ (Կնոջը): Դու էլ վրեր մի քիչ խոնարհվիս, փիս չինի, հաա: (Ծիծաղում ու հագում է):

ԵՎԳԻՆԵ. Ո՞րտեղ կկամենայիք թեյ խմել, այստե՞ղ, թե սեղանատանը: (Ուզում է գնալ):

ՏԻԿ. ՄԱՐԹԱ. Իհարկե այստեղ: Սեղանատանը շատ տոթ է: Բայց դու մի գնար, ես ինքս կկարգադրեմ: (Գնում է սեղանատուն, ձեռով նշան անելով Եվգինենին՝ նստել: Նույն վայրկյանին ներս են մտնում նախասենյակի դռնից Միհրանը, Սուլթանյանը և Վարսամյանը):

ՏԵՍԻՆ 5.

ՆՐԱՆԶ, ՄԻՅՐԱՆ, ՍՈՒԼԹԱՆՅԱՆ և ՎԱՐՍԱՄՅԱՆ

ՄԻՅՐԱՆ. (Բարևելով ուրախ ու զվարթ) Հյուրե՛ր, ավելի թանկագին սյուրպրիզ չէր կարող լինել ինձ համար: (Սառափյանին): Սա, ֆրակով, հասկացա, Միրզաջանովների ճաշին ես եղել: (Գալամբարյաններին) Հուսով եմ, այս երեկոն լավ կանցկացնենք: Հազիվ կարողացա այս անպիտանին (ցույց տալով Սուլթանյանին) բերել այստեղ:

ԵՎԳԻՆԵ. Սուլթանյանին: Մի՞թե այդքան ծանծրանում եք մեր տանը, որ ուժով են բերում ձեզ:

ՍՈՒԼԹԱՆՅԱՆ. Օճ, ոչ տիկին: Ես միշտ հոգեպես հանգստանում եմ ձեր ընկերության մեջ: Եթե զբաղված չլինեի, ես ինքս կձանձրացնի ձեզ իմ այցելություններով: (Հյուրերը նստում են: Վարսամյանը բռնում է մի համեստ անկյուն):

ՏԻԿ. ԳԱԼԱՍՔԱՐՅԱՆ. (Յեզնաբար) Արդյոք, ինչո՞վ է զբաղված մեր ինժեներ-տեխնոլոգը:

ՍՈՒԼԹԱՆՅԱՆ. (Ձեռ տալով) Նյութականով, տիկին, նյութականով:

ՄԻՅՐԱՆ. Եվգինե, մեզ թեյ տալու՞ են, թե չէ:

ԵՎԳԻՆԵ. Ախ, Մարթան ամեն բան ուշացնում է: (Մոտենում է սեղանատան դռներին, նայում ներս, հետ դառնում) Իսկույն:

ՄԻՅՐԱՆ. (Վարսամյանին) Համազասպ, ինչ ես այդ անկյունում թաքնվել. մոտեցիր, տիկիններին զբաղեցնելու, իսկ ես գնում եմ աղջկա տեսնելու: Ամբողջ օրը չեմ տեսել նրան: (Գնում է):

ԵՎԳԻՆԵ. Զնած է, զգույշ որ չզարթնեցնես:

ՏԻԿ. ԳԱԼԱՍՔԱՐՅԱՆ. (Եվգինեին) Ի՞նչ քնքուշ հայրիկ է: (Դառնալով տղամարդկանց): Պարոններ, ինչո՞ւ օրինակ չեք վերցնում պարոն Միհրանից: Տեսնո՞ւմ եք ամուսնական կյանքի քաղցրությունը: (Երմոնեն թեյ է բերում և բաժանում):

ՍՈՒԼԹԱՆՅԱՆ. Ամուսնությունը, տիկին, վիճակախաղ է: Եթե Միհրանի տոմսակը տարել է ամենախոշոր գումարը, այդ չի նշանակում, որ մեր տոմսակները փուչ չեն դուրս գալ:

ՏԻԿ. ԳԱԼԱՍՔԱՐՅԱՆ. Ինչպես Արաբաջյանի՞նը, ախ ի դեպս, կարդացել եք Թիֆլիսի լրագրներում այդ պատմությունը: (Նայում է Եվգինեին):

ՍՈՒԼԹԱՆՅԱՆ. Ինչպես չէ, ուր գնում եմ, այդ մասին եմ լսում: Դա մի սարսափելի դրամա է:

ՍԱՌԱՓՅԱՆ. (Որ դիտե տիկին Գալամբարյանի հետին միտքը): Այո, դա եղեռնագործություն է և անմիտ եղեռնագործություն:

Պ. ԳԱԼԱՍՔԱՐՅԱՆ. Հունցոր կարուհին ա ասըմ, թամամ բիաբուռչիթոն ա:

ՏԻԿ. ԳԱԼԱՍՔԱՐՅԱՆ. Մի գործ, որ ամոթ է բերում մեր ինտելիգենցիային:

ՎԱՐՍԱՄՅԱՆ. (Որ զբաղված է գեղարվեստական իրերով ծածկված սեղանի մոտ, լուսանկարները դիտակով նայելով) Ինտելիգենցիան, արդյոք, ի՞նչ դեր է կատարում այդտեղ:

ՏԻԿ. ԳԱԼԱՍՔԱՐՅԱՆ. Պարոն Արաբաջյանը համարվում է իր կնոջ ինքնասպանության պատճառը, իսկ նա համալսարանական է:

ՎԱՐՍԱՄՅԱՆ. Եվ ի՞նչ: Մի՞թե մի մարդու մեղքը պիտի ամբողջ դասակարգի վզին փաթաթել:

ՍՈՒԼԹԱՆՅԱՆ. Իմ կարծիքով, այդ Արաբաջյանն այնքան էլ արժանի չէ այն հալածանքին, որին ենթարկել է նրան հասարակական կարծիքը:

ՄԻՅՐԱՆ. (Ներս է մտնում) Զնած է, հարբածի պես: (Նստում է Եվգինեի մոտ և սկսում ականջ դնել խոսակցությանը):

ՏԻԿ. ԳԱԼԱՍՔԱՐՅԱՆ. Դուք արդեն չափազանց ներողամիտ եք դեպի Արաբաջյանը: Երևի գործին լավ ծանոթ չեք: (Ներս է մտնում Մարթան մի բաժակ թեյ ձեռին խառնելով):

ՍԱՌԱՓՅԱՆ. Ես էլ լավ ծանոթ չեմ այդ գործին:

ՄԻՅՐԱՆ. Այդ ի՞նչ է, Բաթումի դրամայի մասի՞ն եք խոսում: Օօ, ես շատ լավ գիտեմ: Թիֆլիս եղած ժամանակս մի օր մտա պալատը և կարդացի ամբողջ գործը: (Եվգինեին): Ես քեզ դեռ չե՞մ պատմել:

ԵՎԳԻՆԵ. Ոչ, բայց մի քանի թույլ առաջ կարդացի լրագրում:

ՄԻՅՐԱՆ. Օո, ոչ, ես ավելի մանրամասն գիտեմ: Դա մի նշանավոր երևույթ է:

ՏԻԿ. ԳԱԼԱՍՔԱՐՅԱՆ. Հապա, հապա, պատմեցեք, շատ հետաքրքրական է:

ՄԻՅՐԱՆ. Ես կպատմեմ միայն էականը: Այդ Առաքել Արաբաջյանը համառ կերպով, նախադրյալ միտումով և սիստեմատիկաբար հալածել է իր կնոջը: Հալածել է գիշեր-ցերեկ, անդադար, որպեսզի հուսահատեցնի նրան: Նա գրկել է կնոջն ամեն հաճույքից, երբեմն չի թույլ տվել ուտել անգամ, հետը խոսել է՝ միշտ կոպիտ, շատ անգամ հայիոյանքներով: Ամեն քայլում հիշեցրել է նրան իր անցյալի տխուր սխալը և խայթել, խայթել է կարիճի պես: Եվ այս բոլորն այն օրից, երբ կինն անկեղծ, ազնվաբար, կարող եմ ասել նույնիսկ հերոսաբար, խոստովանել է իր անցյալի սխալը: Նա ներում է խնդրել մարդուց արտասուքն աչքերին, ոտներին ընկած: Մի մոռացեք, որ այդ սխալն անբախտ կինը գործել է գրեթե մանուկ հասակում: Մարդու սիրտը չի մեղմացե նա չի ներել: Նա, ընդհակառակը, պահանջել է թշվառից անձնասպանություն գործել: Նա թույլ է բերել տուն, դիտմամբ թողել է կնոջ ննջարանում, սեղանի վրա: Նա ուզեցել է ազատվել կնոջից իր պատիվն իբրև մաքրելու համար: Եվ մաքրել է. տիկին Արաբաջյանը թունավորվել է, թունավորելով արգանդում և՛ մի անմեղ էակի: Ահա մոայլ եղելությունը: Հետաքրքրական է կնոջ տանջանքը, բայց այդ մի սարսափելի տրագեդիա է, որ ես չեմ նկարագրիլ, խնայելով ձեր ներվերը:

ՏԻԿ. ԳԱԼԱՍՔԱՐՅԱՆ. (Նայելով Եվգինեին) Կարելի է երևակայել:

ՍՈՒԼԹԱՆՅԱՆ. Եվ մի՞թե այդ մարդը, որին դու գրեթե հրեշացրիր, ինքը չի՞ տանջվել:

ԵՎԳԻՆԵ. (Որ այս խոսակցության ամբողջ միջոցին, մի անկյունում, սակայն հասարակությանը նկատելի տեղ նստած, խորին ուշադրությամբ լսում է, երբեմն ցիցվելով): Տանջվել է:

ՄԻՅՐԱՆ. Այո, տանջվել է և այժմ էլ տանջվում է: Նրա Հոգեկան դրությունն էլ մի տրագեդիա է, բայց ի՞նչ է այդ տրագեդիան գործված հանցանքի համեմատ:

ՏԻԿ. ՄԱՐԹԱ. Եվ ի՞նչը պիտի տանջե նրան իսկապես: Ցանկալի է իմանալ:

ՍՈՒԼԹԱՆՅԱՆ. Խղճի խայթոցը:

ՎԱՐՍԱՄՅԱՆ. Խղճի խայթոց (Հեզնաբար): Էի, պարոններ, ում չի հայտնի, թե ինչ է խիղճ ասված բանը ոմանց համար: Նեղն ընկած ժամանակ ամենազգայուն մարդն անգամ իր խղճի առջև դուրս է բերում այնպիսի ճարպիկ կոմպրոմիսներ, որոնք կամաց-կամաց հանգստացնում են նրան ու թմրեցնում:

ՏԻԿ. ԳԱԼԱՍՔԱՐՅԱՆ. (Շարունակելով նայել Եվգինեին) Այո, ճիշտ է, բայց հասարակական կարծիքը:

Պ. ԳԱԼԱՍՔԱՐՅԱՆ. Լոխ էլ թքում ըն անաստվածի իրենսին:

ՍԱՌԱՓՅԱՆ. Լո՛խ: Ոչ, պարոն Բարսեղ, հասարակական կարծիքն օպերետային դատավոր է. ավագակին դատելով, նույն ավագակի հետ կանկան է պարում: (Բոլորը ծիծաղում են, բացի Եվգինեից):

Պ. ԳԱԼԱՍՔԱՐՅԱՆ. (Հազալով և ծիծաղելով) Գյափո՛ ինի, Սռափո՛վ:

ՎԱՐՍԱՄՅԱՆ. Մենք գիտենք միայն վրդովվել, իսկ պատժել-երբեք: Կանցնի մեկ, շատ-շատ երկու տարի, ամեն ինչ կմոռացվի, և դուք, ես, բոլորս նորից կսկսենք սեղմել նույն Առաքել Արաբաջյանի ձեռքը, նորից հարգանք ցույց տալ նրան:

ՍԱՌԱՓՅԱՆ. Այդ Արաբաջյանը հիմար է, եթե ես լինեի նրա տեղը, կստիպեի այն անպիտանին կնոջս հետ ամուսնանալ, ինքս էլ խաչեղբայր կլինեի: (Բոլորը ծիծաղում են, բացի Եվգինեից):

Պ. ԳԱԼԱՍՔԱՐՅԱՆ. (Ծիծաղելով ու հազալով) Վըեյ, մըեռա, Սռափռվ, մըեռա....

ՏԻԿ. ԳԱԼԱՍՔԱՐՅԱՆ. Իսկ դուք, պ. Սուլթանյան, ի՞նչ կանեիք:

ՍՈՒԼԹԱՆՅԱՆ. Ես կարծակեի կնոջս, ապահովելով նրան նյութապես: (Երմոնեն գալիս է և բաժակները հավաքում):

ՏԻԿ. ՄԱՐԹԱ. Ո՞վ է էլի թեյ ցանկանում, (Բոլորը լուռ հրաժարվում են):

ՏԻԿ. ԳԱԼԱՍՔԱՐՅԱՆ. Իսկ դուք ինչ կանեիք, պարոն Ալվերդյան, եթե այդ Արաբաջյանի տեղը լինեիք (Եվգինեն ցնցվելով ուշադրությունը լարում է):

ՍԱՌԱՓՅԱՆ. (Առանձին) Օձ...

ՄԻՅՐԱՆ. Ե՞ս... Կներեի:

ՏԻԿ. ԳԱԼԱՍՔԱՐՅԱՆ. Ձեր կնոջ անպատվությունը...

ՄԻՅՐԱՆ. Այո:

ԵՎԳԻՆԵ. (Հանկարծ արձակում է թեթև ճիչ) Ա՛հ...

ԱՄԵՆԸԸ. Ի՞նչ պատահեց:

ՄԻՅՐԱՆ. (Վախեցած, ոտքի կանգնելով) Եվգինե....

ԵՎԳԻՆԵ. Ոչինչ... (Աշխատում է ժպտալ): Կայծակը...

ՍԱՌԱՓՅԱՆ. (Մոտենալով լուսամուտին): Եվ ի՞նչ կայծակ: Ահա և սարսափելի որոտում: (Լսվում է որոտում):

Պ. ԳԱԼԱՍՔԱՐՅԱՆ. Եղիա մարգարեի քյուրքը ճղեցին:

ՍԱՌԱՓՅԱՆ. (Ծիծաղում է), Հա, հա, հա քյուրքը:

ՏԻԿ. ԳԱԼԱՍՔԱՐՅԱՆ. (Մոտենում է Եվգինեին և սուր հայացքով նայում նրա երեսին): Դուք կայծակի՞ց եք ավելի վախենում, թե՞ փոթորիկից, (Եվգինեն տխուր ժպտում է): Ինչո՞ւ ընդհատեցիք հետաքրքրական խոսակցությունը: (Նստում են): Հա, ուրեմն, պարոն Միհրան, դուք կներեք:

ՍՈՒԼԹԱՆՅԱՆ. Այդ ինձ համար անհասկանալի է:

ՏԻԿ. ՄԱՐԹԱ. Միհրան, այդ ի՞նչ ես ասում,

Պ. ԳԱԼԱՍՔԱՐՅԱՆ. Էդ հո՞ւնց կներեիր, խելքս իսկի պեն չի կտրում:

ՍԱՌԱՓՅԱՆ. Այո, հունց:

ՎԱՐՍԱՄՅԱՆ. (Ոտքի է կանգնում, հանկարծ ոգևորվելով) Չեմ հասկանում, ինչու է ձեզ զարմացնում Միհրանի ասածը: Միթե տիկին Արարատյանն անբարոյական է եղել: Անպիտանի մեկը նրան մոլորեցրել է համարյա թե մանուկ հասակում — օրիորդը տասնուհինգ տարեկան է եղել: Մի՞թե դա այնպիսի մեծ հանցանք է, որի համար ամուսինը պիտի տանջեր նրան մինչև ինքնասպանություն: Ասացեք, խնդրեմ, ո՞ր տղամարդն է մինչև

ամուսնությունը իրան մաքուր պահում: Կարո՞ղ եք ցույց տալ մի այդպիսի տղամարդ: Ինչո՞ւ կանայք ներում են մեր ամենագզվելի կեղտերը, իսկ մենք չենք ուզում ներել նրանց սխալը: Ես թույլ եմ տալիս, որ Արարաշյանը կարող էր չափազանց կատաղել կնոջ դեմ նրա անցյալի պատճառով: Թույլ եմ տալիս, որ նա պիտի իրան խայտառակված համարեր: Բայց ո՞ւր էր այդ մարդու ներքին դատավորը, որ հիշեցներ նրան իր սեփական անցյալը, ուր անշուշտ կան կեղտեր: Ինչո՞ւ թշվառ կինը ներել է նրան այդ կեղտերը, իսկ ինքը — ոչ: Որովհետև մեկը կին է, մյուսը տղամարդ. Որովհետև հասարակական կարծիքի ամբողջ լուծը կանանց վրա է ծանրացած: Բայց չէ՞ որ այդ անարդարություն է, սոսկալի անարդարություն: Ե՛վ ինչու գոնե մի անգամ չբողոքել անարդարության դեմ: (Տիրում է մի քանի վայրկյան լռություն: Եվգինեն, իր խռովությունը թաքցնելու համար, մոտենում է դաշնամուրին և սկսում կամացուկ, դողդողուն ձեռներով և ներվային քրքրել նոտաները: Տ. Գալամբարյանը շարունակ դիտում է նրան, իսկ Սառափյանը դիտում է տիկ. Գալամբարյանին: Միհրանը, լսելով Վարսամյանին, հավանության նշաններ է անում):

ՍՈՒԼԹԱՆՅԱՆ. Տարօրինակ բողոք, Մոռանամ հարազատ կնոջս կեղտը, թե ինչ է բողոքում եմ անարդարության դեմ: Ազատի՛ր ինձ այդ տեսակ բողոքից:

ՎԱՐՍԱՄՅԱՆ. Սխալը, պարոն Սուլթանյան, և ոչ կեղտը, սխալը: Սակայն կարելի էր և կեղտը մոռանալ, եթե մեր աշխարհայացքն ավելի լայն լիներ: Ով գիտե, գուցե ապագայում հասկանանք, որ տղամարդի և կնոջ բարոյական պարտավորությունները հավասար են, հասկանանք նաև, որ հանցանք ներելը հանցանք գործել չէ: Իսկ սխալը, հափշտակվելը, անպիտաններից խաբվելն այժմ էլ կարող ենք ներել, պետք է ներենք, մինչև անգամ պարտավոր ենք ներել:

ՍՈՒԼԹԱՆՅԱՆ. Այդ մասին ես ձեզ հետ կվիճեմ հետո: Այժմ թողնենք, տիկին Եվգինեն ձանձրանում է:

ՏԻԿ. ԳԱԼԱՄԲԱՐՅԱՆ. Ես այդ վաղուց եմ նկատում:

ՍԱՌԱՓՅԱՆ. Խնդրենք տիկնոջը, մեզ համար մի բան նվագի:

ՍՈՒԼԹԱՆՅԱՆ. Այ, այդ ես հասկանում եմ, Տիկին, մի՛ գրկեք մեզ հաճույքից:

ՍԱՌԱՓՅԱՆ. Եվգինեն նազ անողներից չէ:

Պ. ԳԱԼԱՄԲԱՐՅԱՆ. Ըմբո՛, խե պըտի նազ անի, խե, մուկը հովընք:

Եվգինեն նստում է դաշնամուրի մոտ և նվագում է ձեռքին ընկած առաջին նոտան: Վարսամյանը և Մարթան մի անկյունում վիճում են: Միհրանը ծխելով անցուդարձ է անում խորքի պատի տակ հանդարտ քայլերով:

ՏԻԿ. ԳԱԼԱՄԲԱՐՅԱՆ. (Առանձին, ամուսնուն) Նկատեցի՞ր քանի անգամ գույնը փոխեց:

Պ. ԳԱԼԱՄԲԱՐՅԱՆ. Ա կնիկ, թողար տեսնենք, պեն չունիս..

ՍԱՌԱՓՅԱՆ. (Պառլա: Լսում է, հետո) Հիանալի՛ է, հիանալի... Բայց այդ, կացեք, կացեք, այդ ծանոթ բան է...

ԵՎԳԻՆԵ. Շոպենի նոկտյուրն է «Կաթիլ» անունով. ես շատ եմ սիրում... ամբողջ օրը այլուպետրի վրա է... Ոչ — մեխանիզմի, ոչ — վիշտ, այլ հիվանդ հոգու տառապանք: (Կամաց-կամաց ձեռները թովանում են, գլուխը թեքվում է կրծքին):

ՏԻԿ. ՄԱՐԹԱ. (Մոտենալով Եվգինեին) Ահ, ի՞նչ պատահեց, դու գունատվեցիր: (Եվգինեն նվագում է): Ուշքը գնում է... Ջո՛ւր... (Բոլորը շփոթվում են, շրջապատելով Եվգինեին: Սառափյանը ջուր է մոտեցնում):

ՄԻՀՐԱՆ. (վախեցած) Եվգինե՛... (Զոքում է նրա առջև):

ՏԻԿ. ԳԱԼԱՍՔԱՐՅԱՆ. (Ամուսնուն) Լա՛վ ուշադրություն դարձրու, այդ բոլորը նրանից է...

Պ. ԳԱԼԱՍՔԱՐՅԱՆ. Փիե՛...

ԵՎԳԻՆԵ. (Ուշքի գալով) Ոչինչ, մի՛ վախենար: (Միհրանի օգնությամբ վեր է կենում, ճիգ անելով ժպտալ): Կայծակն ինձ վախեցրեց: (Հյուրերին) Ներեցեք, խնդրեմ, գլուխս պտտեց, ուրիշ ոչինչ... Անցավ, բոլորովին անցավ: Նստեցեք, ուրիշ բան կնվագեմ... (Սկսում է նվագել ուրախ բան: Բայց հյուրերն այնքան շփոթված են, որ չեն վստահանում ձանձրացնել տանտիրուհուն):

Պ. ԳԱԼԱՍՔԱՐՅԱՆ. Էդ մուգիկը որ կա մարդու արինը տակն ու վրա ա անըմ...

ՍՈՒԼԹԱՆՅԱՆ. (Պաուզա) Գոնե ես չեի կամենալ ձեզ ձանձրացնել, տիկին: Դուք, երևի, տկար եք կամ հոգևած, հանգստացեք...

ՄԻՀՐԱՆ. (Դաշնամուրի կափարիչը ծածկելով): Ես քեզ արգելում եմ...

ՏԻԿ. ԳԱԼԱՍՔԱՐՅԱՆ. Բարսեղ, գնա՛նք,

ՄԻՀՐԱՆ. (Տիկ. Գալամբարյանին) Դուք կներե՛ք...

ՏԻԿ. ԳԱԼԱՍՔԱՐՅԱՆ. Ի՞նչ ներելու բան կա, ես առանց այդ էլ երկար մնալ չեի կարող, ես գործով էի եկել: (Եվգինեին, որ տակավին գունատ կանգնած է դաշնամուրի: Չմոռանաք իմ առաջարկության մասին պարոն Միհրանից թույլտվություն խնդրե):

ՄԻՀՐԱՆ. Այդ ինչ թույլտվություն է:

ՍԱՌԱՓՅԱՆ. (Հեգնաբար) Տիկինը մի նոր ընկերություն է հիմնել, առաջարկում է Եվգինեին անդամ դրվել: Մի խոսքով, երկու հարյուր ռուբլու գործ է:

ՄԻՀՐԱՆ. Իմ ամուսինն ազատ է անելու ինչ որ ցանկանում է, իսկ իմ գրպանը միշտ նրա տրամադրության տակ է:

ՏԻԿ. ԳԱԼԱՍՔԱՐՅԱՆ. (Եվգինեին խորհրդավոր) Լսո՞ւմ եք, ազատ եք անելու, ինչ կամենում եք: Գնահատեցե՛ք, ցտեսություն:

Պ. ԳԱԼԱՍՔԱՐՅԱՆ. Ձեզ տեսություն, Սոափով, թաթդ տոր տեսնեմ, քը մատաղ, (Սեղմում է ձեռքը):

(Հյուրերը գնում են. Միհրանն ու Մարթան ուղեկցում են նրանց մինչև, նախասենյակ):

ՍԱՌԱՓՅԱՆ. (Դռների մոտ, բոլորից թաքուն բռնելով Միհրանի թևը) Մոտո՛ հիսուն ռուբլի կա՛: (Միհրանը վարտիքի գրպանից հանում է ու տալիս երկու հատ ճիւլոված 25-անոց): Մերսի՛... (Մոտենում է Եվգինեին, որ կանգնած է սենյակի մեջտեղում): Եվ շատ լավ ես անում, որ այդ խորամանկ տիկին Գալամբարյանին պատիվ չես անում մինչև նախասենյակ ճանապարհ դնելու: Հետո կասեմ պատճառը: Ցտեսություն: (Դռների մոտ հանդիպում է Միհրանին ու Մարթային) Ցտեսություն: (Գնում է):

ՏԵՍԻԼ 6

ԵՎԳԻՆԵ, ՄԻՀՐԱՆ ԵՎ ՏԻԿ. ՄԱՐԹԱ

Մինչև Միհրանի և Մարթայի վերադառնալն Եվգինեն ժողովում է ուշքը բոլորովին և ժպտում նրանց երեսին:

ՄԱՐԹԱ. Դու մեզ վախեցրիր, Եվգինե, մի՞թե կարելի է այդչափ ներվային լինել:

ԵՎԳԻՆԵ. Դատարկ բան էր, անցավ, չարժե մտածել.....

ՄԻՅՐԱՆ. Ես քեզ հարյուր անգամ խնդրել եմ, երբ տրամադիր չես — հյուրեր չընդունել: Ինձ համար քո հանգստությունն ամեն բանից թանկ է:

ՄԱՐԹԱ. Լրագրները ո՞րտեղ թողեցիր:

ԵՎԳԻՆԵ. Զո սենյակում, սեղանի վրա:

ՄԱՐԹԱ. Ընթրիքի չսպասեք ինձ: (Գնում է ձախ կողմի երկրորդ դռներով):

ՏԵՍԻԼ 7

ՄԻՅՐԱՆ և ԵՎԳԻՆԵ.

ՄԻՅՐԱՆ. (Պաուզա) Վերջապես, մենակ եմք: (համբուրում է) Նստի՛ր: Ես ուզում եմ մի բանի մասին խոսել քեզ հետ: (Նստում են բազկաթոռների վրա դեմ ու դեմ) Մի՛ վախենար, վախենալու ոչինչ չկա: Գիտես ինչ, Եվգինե ահա մի քանի ամիս է քեզ փոխված եմ տեսնում: Կարծես, քեզ անհանգստացնում է ինչ-որ վիշտ, հոգս, վերջապես, մի միտք և քանի գնում է, այդ փոփոխությունն ավելի ու ավելի նկատելի է դառնում: Ասա, ի՞նչ է պատահել:

ԵՎԳԻՆԵ. (Վեր կենալով) Այդ մասին այսօր ոչինչ մի՛ հարցրու:

ՄԻՅՐԱՆ. Ներողություն, դու իրավունք ունիս: Դու տկար ես, գնա, ուրեմն հանգստացիր: (Վեր է կենում):

ԵՎԳԻՆԵ. (Քնքշաբար) Նեղացա՞ր: (Ժպտալով) Ես տկար չեմ, անցավ, մի նեղանար:

ՄԻՅՐԱՆ. Բայց դու ինձ խաբել չես կարող, դու մի հոգս ունիս, մի կեղծիր, կեղծելը քեզ չի սազում:

ԵՎԳԻՆԵ. (Հառաչելով) Զի սազում... (Ճակատը շփելով) Թո՛ղ ինձ, ես ուզում եմ քեզ համար նվագել...

ՄԻՅՐԱՆ. Երաժշտությունը քեզ հուզում է:

ԵՎԳԻՆԵ. Երբ հյուրերի ներկայությամբ եմ նվագում, իսկ երբ հյուրեր չկան, հանգստություն է տալիս իմ ներվերին: (Նստում է դաշնամուրի քով: Միհրանը տարակուսած կանգնում է նրա մոտ: Եվգինեն սկսում է նվագել ինչ-որ մեղամաղձոտ եղանակ, բայց շուտով թողնում է և. գլուխը թեքում կրծքին ու լռում: Պաուզա) Ո՛չ, չեմ կարող, ձեռներս չեն շարժվում: (Միհրանն ուները բարձրացնելով, տարակուսած նայում է նրան շարունակ) Օո, ի՞նչ տոթ է, կարծես, օդ չկա: (Վեր է կենում, լուսամուտներից մեկի վարագույրը հետ քաշում, հետո փեղկը բաց անում) Ի՞նչ հիանալի երեկո է, անձրևից հետո լուսին: Ի՞նչ մաքուր է երկինքը: (Մոտենում է և պակասեցնում բրոնզյա լամպարի լույսը: Ներս է սփռվում լուսնի մեղմ կաթնագույն լույսը):

ՄԻՅՐԱՆ. Բայց ցուրտ է, կարող ես մրսել, հեռու կաց: (Բռնում է թևից և լուսամուտից հեռացնում: Հետո լուսամուտը ծածկում է, լամպարի լույսն ավելացնում և նայում նրան ուշադիր):

ԵՎԳԻՆԵ. Երանի թե մրսեի ու հիվանդանայի: Երանի մեռնելի: Ա՛խ, տեր աստված, որքա՛ն անտանելի է:

ՄԻՅՐԱՆ. (Պաուզա) Եվգինե, նայիր ինձ... (Մոտենում է ու ձեռքից բռնում) Ես քեզ միշտ խելոք կին եմ համարել...

ԵՎԳԻՆԵ. Խելո՞ք... մի ասա այդ բանը:

Լուռ տեսարան

ՄԻՅՐԱՆ. Դեհ, ասելո՞ւ ես, թե ինչի մասին ես մտածում:

ԵՎԳԻՆԵ. Ասե՛մ: Լա՛վ: Նստիր ահա այստեղ: (Նստում են) Լսի՛ր, ես վաղուց ուզում էի քեզ պատմել մի պատմություն, հեքիաթ, ինչպես կամենաս հասկացիր: Ես այդ կարդացել եմ չգիտեմ ինչ գրքում և երբ, բայց ինձ վրա շատ խոր ազդեցություն է արել: Լսո՞ւմ ես:

ՄԻՅՐԱՆ. Լսում եմ:

ԵՎԳԻՆԵ., Եղել է չի եղել, չգիտեմ ուր, ասենք հեռու Արևելքում, Արաբիայի, թե Հնդկաստանի մի հարուստ քաղաքում մի աղքատ այրի: Նրա ամուսինը, մի ազնիվ ու քաջ զինվոր, մեռնելով, իր կնոջ ու միակ աղջկա համար չի թողնում ոչ մի ժառանգություն, բացի իր գեները: Բայց աղջիկը մորից ժառանգում է մի հոգեկան հատկություն — ծայրահեղ ինքնասիրություն: Այդ աղջիկը ոչ շատ գեղեցիկ է եղել, ոչ տգեղ, ոչ շատ խելոք և ոչ հիմար: Մայրը սիրում է նրան ավելի, քան իր աչքի լույսը, փայփայում է մայրական անկաշառ սիրով, ոչինչ չի խնայում նրա համար, տալիս է նրան իր կարողությունից ավելի՝ ուսում և կրթություն:

ՄԻՅՐԱՆ. Այդ հետաքրքրական է, հետո՞...

ԵՎԳԻՆԵ. Մի օր այդ աղջկան տեսնում է մի ազնիվ, եռանդուն, խելոք մարդ (Նայում է Միհրանի աչքերին) մի խուսքով, մարդը հավանում է և իսկույն վճռում է նրա հետ ամուսնանալ: Մայրն ուրախությամբ համաձայնվում է: Աղջիկը չի սիրում այդ մարդուն, երկար ժամանակ կռվում է ինքն իր հետ, բայց հետո նույնպես համաձայնվում է... (Զգացված) իր մորը բախտավորացնելու համար: Նա ամուսնանում է ազնիվ մարդու հետ առանց սիրո, բայց հետո, երբ ճանաչում է նրան, սկսում է ոչ միայն սիրել, այլ ուղղակի պաշտել, պաշտել ինչպես կուռք: Իսկ բարի մարդը սիրում է նրան: Հավատում և շրջապատում է շքեղությամբ և այն բոլորով, ինչ որ գեղեցկացնում է կնոջ կյանքը...

ՄԻՅՐԱՆ. (Պաուզա) Հետո՞ ...

ԵՎԳԻՆԵ. (Հառաչելով ու ճակատը շփելով) Բայց շուտով մարդու երախտիքը սկսում է ուտել նրան — ուտել ցեցի պես: Չէ՞ որ նա չքավոր ծնողների զավակ է: Մարդը նկատում է նրա վիշտը և պատճառը հարցնում: Մի օր կինն ընկնում է նրա ոտներին և ասում. «քո անհուն սերն է ինձ տանջողը... ես մեծ պարտքի տակ եմ» — ահա իմ վիշտը: Ես ինքնասեր եմ, չեմ կարող տանել այդ պարտքը: Ազնիվ մարդն ապշած արտասանում է. «դու խելագար ես, առաջին անգամն եմ տեսնում, որ սիրող կինն իր ամուսնու սիրուց տանջվի»: «Այո, պատասխանում է կինը, քո սերն է ինձ տանջում: Մի սիրիր ինձ և ոչ միայն մի սիրիր, այլև ատիր, վարվիր հետս կոպիտ, ծեծիր ինձ... հայիոյիր, և ես պակաս կտանջվեմ»: (Պաուզա) Մարդը չի կատարում նրա տարօրինակ խնդիրը: Այն ժամանակ ինքնասեր կինը կամաց-կամաց մաշվում է վշտերից, թոքախտ է ստանում ու մեռնում: (Պաուզա) Ահա և ամբողջ հեքիաթը: (Վեր է կենում):

ՄԻՅՐԱՆ. (Որ խորասուզված լսում է մինչև վերջը, մի փոքր լռությունից հետո) Եվ դա հեքիաթ է...

ԵՎԳԻՆԵ. Հեքիաթ...

ՄԻՅՐԱՆ. Դու բոլորը պատմեցիր:

ԵՎԳԻՆԵ. Բոլորը:

ՄԻՅՐԱՆ. (Ոտքի է կանգնում կամացուկ, նայելով Եվգինեի երեսին) Ոչ, կարծեմ մի բան մոռացար: Այդ հեքիաթն ինձ ծանոթ է: Ինքնասեր կինը լինում է բարոյապես իր մարդուց շատ բարձր: Այնքան բարձր, որ մարդու բոլոր արժանավորությունները նսեմանում են նրա մոտ: Ինքնասեր կինը լինում է այնքան գրավիչ, այնքան հրապուրիչ, որ իր մի ժպիտով վարձատրում է ամուսնու բոլոր բարությունները: (Համբուրում է): Եվգինե, դու չես կարողանում հեքիաթներ պատմել, ավելի լավն է պատմիր եղելությունը:

ԵՎԳԻՆԵ. Եղելություն: (Պաուզա. Միհրանը նայում է նրան: Եվգինեն երկու ձեռները դնում է նրա ուսերի վրա, նայում աչքերին) Որքա՞ն բարություն կա քո աչքերում: Ձայնը դողդողում է) Իսկ ե՞ս... (Աչքերը լցվում են արտասուքով) Բավական է... (Ձեռները վերցնում է Միհրանի ուսերից և հեկեկալով վազում դեպի ննջարան):

ՄԻՅՐԱՆ. (Ապշած նայում է նրա հետևից և երբ Եվգինեն բոլորովին անհետանում է: Պաուզա) Չեմ հասկանում... Ձեռքը սեղմում է ճակատին):

Վարագույր

ԱՐԱՐՎԱԾ Բ.

Նույն սենյակը, նույն կահ-կարասին ցերեկով: Կեսօրյա մեկ ժամն է: Լուսամուտները դեպի փողոց բաց են: Հատակի նաև կահ-կարասիի մի մասի վրա սփռվել են ապրիլյան արեգակի ախորժալի ճառագայթները:

ՏԵՍԻԼ 1

ՀՈՒՓՍԻՄԵ, ՄԱՐԹԱ, հետո ԵՎԳԻՆԵ.

ՀՈՒՓՍԻՄԵ. (Ներս է մտնում նախասենյակի դռներից գլխարկով ու վերարկուով: Նայում է շուրջը: Ոչ ոքի չտեսնելով, մոտենում է նախ Միհրանի առանձնասենյակի դռներին, ականջ դնում: Ձայն չսելով, մոտենում է ննջարանի դռներին, ուզում է ներս մտնել, թողնում է մտադրությունը, հետ դառնում: Ձախ կողմի խորքի, այն է սեղանատան՝ դռներից ներս է մտնում Մարթան հագնված՝ գլխարկով): Ահ, ո՞րտեղ եք: (Համբուրվում են) Մտնում եմ ներս, ոչ ոք, աղախին էլ չկա, իսկ դռները բաց գողերի համար:

ՄԱՐԹԱ. Այդ, երևի, Միհրանն է մոռացել աղախինն կանչել, որ դռները փակի: Նա մոռացկոտ է:

ՀՈՒՓՍԻՄԵ. Ժենյան տա՞նն է:

ՄԱՐԹԱ. Այո: Ուշ է զարթնել, հագնվում է:

ՀՈՒՓՍԻՄԵ. Նոր: (Նայելով իր ժամացույցին) Մեկն է, չլինի թե հիվանդ է:

ՄԱՐԹԱ. Զգիտեմ, Բայց ահա և՛ ինքը, (Ներս է մտնում Եվգինեն ննջարանի դռներից: Նա հագած է տնային, բայց թանկագին կտորից նորածն կարած շրջագգեստ) Բարի կեսօր...

ԵՎԳԻՆԵ. Այո, ուշ եմ զարթնել: Միայն լուսաբացին եմ աչքերս փակել: (Համբուրվում է մոր հետ):

ՀՈՒՓՍԻՄԵ. Ինչո՞ւ:

ԵՎԳԻՆԵ. Կարդում էի:

ՀՌԻՓՍԻՄԵ. Երբ պիտի ձեռք վերցնես կարդալուց: (Մարթային) Երեխայությունից գրքերի սիրահար է: Պատահել է, որ մի գիրք ուժով ձեռքից խլել եմ, թաքցրել, կես ժամ չանցած՝ մի ուրիշն է վերցրել: Ցավ է էլի:

ԵՎԳԻՆԵ. (Մարթային) Ո՞ր ես այդպես պատրաստվում:

ՄԱՐԹԱ. (Ձեռնոցները հագնելով) Ուզում եմ տիկին Սուրաթյանին այցելել: Բայց առաջ պիտի մտնեմ տիկին Գալամբարյանի մոտ: Միհրանն ինձ տվեց 200 ռուբլի, որ այսօր անպատճառ տանեմ այն նոր ընկերության համար:

ՀՌԻՓՍԻՄԵ. (Եվգինեին) Մարգոն ի՞նչ է անում, ասա է:

ԵՎԳԻՆԵ. Դայակը նրան տարել է զբոսեցնելու: (Մարթային) Մի՛ տանիր այդ փողերը:

ՄԱՐԹԱ. Ինչո՞ւ:

ԵՎԳԻՆԵ. Ես այդպես եմ կամենում:

ՄԱՐԹԱ. Խնայողությո՞ւն է այդ, թե՞ կապրիզ:

ԵՎԳԻՆԵ. Ինչպես կամենաս — հասկացիր, միայն այդ փողերը մի տանիր:

ՄԱՐԹԱ. Լավ, Վերցրո՞ւ: (Տալիս է փողերը):

ԵՎԳԻՆԵ. Պահիր մոտդ, կվերադարձնես Միհրանին:

ՄԱՐԹԱ. Չեմ հասկանում միտքդ: Դեհ, ների՛ր, մայրիկ, ես շտապում եմ, բայց շուտով կվերադառնամ:

ՀՌԻՓՍԻՄԵ. Ես էլ երկար չեմ նստելու: (Մարթան գնում է):

ՏԵՍԻԼ 2

ԵՎԳԻՆԵ Ա ՎՌԻՓՍԻՄԵ

ԵՎԳԻՆԵ. Այդ ո՞ր ես շտապում, մամա: Գլխարկդ վերցրու, միասին նախաճաշ կանենք:

ՀՌԻՓՍԻՄԵ, ՉԷ, պետք է գնամ հորաքրոջդ մոտ: Երկու ամիս է չեմ տեսել, ամիթ է: Նա քեզ շատ է սիրում, միշտ գովում է: Ով քեզ սիրում է, ես էլ նրան եմ սիրում: Դու ասա տեսնեմ, ինչո՞ւ այսօր աչքուկքդ թթված է:

ԵՎԳԻՆԵ. Ասացի, որ անքուն եմ եղել:

ՀՌԻՓՍԻՄԵ. Ա՛խ, ճշմարիտ ասացիր: Ուշքս տեղը չէ: Գիտես, Ժենյա, քո պսակվելուց հետո ուշքս իսկի վրես չի լինում: Ուրախությունիցս է, ուրախությունիցս: Դու բախտավոր ես, ես էլ հարբածի պես եմ: Աչքիս լույս, հոգիս, (համբուրում է) օրից-օր սիրունանում ես, այ, ինչ ասել է լավ ապրել: Այդ ի՞նչ է, էլի նոր հագուստ: Ախ ոսկի է, ոսկի Միհրանը, թագուհու պես է պահում քեզ: Երեկ մոտս էր, հարյուրերորդ անգամ գովեց քեզ: Ինձանից էլ շնորհակալ է, որ քեզ նման աղջիկ եմ պահել, մեծացրել նրա համար: Նա շատ ուրախ է քեզանով, շատ...

ԵՎԳԻՆԵ. (Հեգնաբար ծիծաղելով) Ավելի կուրախանա, երբ ամեն բան կիմանա:

ՀՌԻՓՍԻՄԵ. Նա ամեն բան գիտե, ամեն բան, ես նրան բոլորը պատմել եմ: Նա այնպես սիրում է հորդ հիշատակը, որ ուզում է նրա անունով մի որդեգիր պահել:

ԵՎԳԻՆԵ. Այդ քեզ ի՞նքն ասաց:

ՀՌԻՓՍԻՄԵ. Ինչպես չէ, հենց երեկ: Այ, կարծեմ, առաջիկա սեպտեմբերից, մեկին վերցնելու է:

ԵՎԳԻՆԵ. Ես չեմ թողնիլ:

ՀՌԻՓՍԻՄԵ. Բա՛հ, ինչո՞ւ:

ԵՎԳԻՆԵ. Չի հարկավոր: Առանց այդ էլ մենք նրան շատ ենք պարտական:

ՀՌԻՓՍԻՄԵ. Պարտական: Ինչո՞վ: Փառք ասածու, ուրիշ զոքանչների պես նրա շլինքին չեմ նստել ու նրա հացով չեմ ապրում:

ԵՎԳԻՆԵ. Ես նրան արժանի չեմ:

ՀՌԻՓՍԻՄԵ. Ո՞վ ասաց արժանի չես: Պոկոպնիկ Միրվելի աղջիկն ո՞ւմ չի արժանի: Եթե նա բարի է, խելոք, փող շատ է աշխատում, պատիվ ունե, դու էլ գեղեցիկ ես, խելոք, հրեշտակի պես մաքուր...

ԵՎԳԻՆԵ. (Հառաչանքը թաքցնելով) Մաքուր, օ՛, տեր աստված, այս ինչ տանջանք է... (Վեր է կենում, մոտենում լուսամուտներից մեկին):

ԵՎԳԻՆԵ. (Արագությամբ իշխելով իրեն) Անքուն եմ, անքուն: Դու որ գնաս, ես պառկելու եմ անկողին...

ՀՌԻՓՍԻՄԵ. Շատ լավ կանես, որդի... ահա ես գնացի... (Համբուրվում է: Լսվում է գանգի ձայն):

ԵՎԳԻՆԵ. Ահա, տեսնո՞ւմ ես, մի ժամ հանգիստ չեն թողնում. Երևի հյուր է: Ես դեռ մազերս կարգի չեմ բերել: Մի փոքր սպասիր, ես իսկույն կգամ: (Գնում է ննջարանի դռներով: Երմոնեն ներս է հրավիրում Գաբրո Ազարյանին ասելով՝ «այստեղ են»):

ՏԵՍԻԼ 3

ՀՌԻՓՍԻՄԵ Ա ԳԱԲՐՈ ԱԶԱՐՅԱՆ

ԳԱԲՐՈ ԱԶԱՐՅԱՆ. (Հագնված է ճաշակով, նորածն: Երեսին սիրալիր ժպիտ, ձևերը նուրբ, ձայնը մեղմ և բարեհամբույր: Հեռվից գլուխ տալով, մոտենում է Հռիփսիմեին) Հուսով եմ չեք մոռացել:

ՀՌԻՓՍԻՄԵ. Վահ. Գաբրո՞... Այդ ո՞ր աստծուց (Գաբրո Ազարյանը համբուրում է նրա ձեռքը, իսկ նա Ազարյանի ճակատը):

ԳԱԲՐՈ. Փողի աստծուց, մայրիկ, մամոնայի: Ամենքը փողի համար այստեղ են վազում, ես էլ վազեցի:

ՀՌԻՓՍԻՄԵ. Շատ ուրախ եմ, որդի, համեցեք, նստիր, որտեղ քեֆդ է: (Գաբրոն նստում է բազկաթոռի վրա, սպասելով սակայն, որ նախ Հռիփսիմեն նստի): Վա՛հ, վա՛հ, աչքերիս չեմ հավատում: Ասա է, ի՞նչ կա, գործով ես եկել:

ԳԱԲՐՈ. Հապա: Ինձ ուղարկել են այստեղ իբրև ներկայացուցիչ մի նոր ընկերության:

ՀՌԻՓՍԻՄԵ. Հա, ով գիտե, հոր պիտի փորեք, նավթ հանեք...

ԳԱԲՐՈ. Այո, այդպիսի մի բան: Ասացեք, ինչպես եք, դուք, Եվգինեն: Լսել ենք, լսել ենք:

ՀՈՒՓՍԻՄԵ. (Պարծանքով ցույց տալով շուրջը) Տեսնում ես էլի, դիմի ժենյայիս համար է սարքած:

ԳԱՐՐՈ. (Դիտելով շուրջը) Հիանալի է, շատ ուրախ եմ: Ասում են, շատ խելոք ու ազնիվ մարդ է ու շատ լավ փաստաբան:

ՀՈՒՓՍԻՄԵ Մի խոսքով, ժենյաս բախտավորվեց, գոհությոնն ասածու: Էհ, ձերոնք ինչպե՞ս են:

ԳԱՐՐՈ. Իմ քույրն էլ անցյալ շաբաթ նշանվեց:

ՀՈՒՓՍԻՄԵ. Վա՛հ, ասա, որ ուրախանամ է: Ո՞րն է նշանվել:

ԳԱՐՐՈ. Փոքրը, Լիզան...

ՀՈՒՓՍԻՄԵ. Ո՞ւմ հետ:

ԳԱՐՐՈ. Մի բժիշկ ուսանողի:

ՀՈՒՓՍԻՄԵ. Աստված երկուսին էլ մեծ բախտի արժանացնի հավատա, որդի, քույրերիդ էլ ու քեզ էլ միշտ հարազատ որդուս պես եմ սիրել: Շատ ուրախ եմ: Աղջիկս բախտավորվելուց հետո, ուզում եմ, որ ամբողջ աշխարհը բախտավորվի: Ախ, ինչպե՞ս է սիրում, ինչպե՞ս է սիրում ժենյայիս...

ԳԱՐՐՈ. (Ծխախոտի արծաթե տուփը գրպանից հանելով) Կարելի՞ է:

ՀՈՒՓՍԻՄԵ. Իհարկե, վա՛հ, մոռացե՛լ ես. որ ես էլ եմ ծխում:

ԳԱՐՐՈ. (Առաջարկում է ծխախոտ) Ես ձեր ոչ մի սովորությունը չեմ մոռացել: Այս շատ լավ պապիրոս է (Հռիփսիմեն վերցնում է ծխախոտ: Ազարյանը վառում է լուցկի, նախ տալիս է նրան ծխելու, ապա ինքն է ծխում) Ինքը Բոգարձյանցն է հատուկ ինձ համար պատվիրել իր գործարանում: Մի մեծ արկղ բերել եմ հետս: Եթե թույլ տաք, վաղը մի քանի հարյուր կուղարկեմ ձեզ համար:

ՀՈՒՓՍԻՄԵ. (Ծխելով) Շատ լավն է, Իսկի չես փոխվել, էլի են Գաբրոն ես, միշտ քաղաքավարի, բարի, կավալեր...:

ԳԱՐՐՈ. Իսկ դուք փոխվել եք, չաղացել եք, ջահելացել, սիրունացել...

ՀՈՒՓՍԻՄԵ. (Շոյված) Այս օրինված քաղաքում ամենքը չաղանում են...

ԳԱՐՐՈ. Օրինված: Այդ ինչի՞ցն է, որ ուրիշներն անիծում են այս քաղաքը, իսկ դուք օրհնում եք:

ՀՈՒՓՍԻՄԵ. Մեղք են գործում անիծողները, որդի, Այս քաղաքի նման քաղաք չկա: Զո թիֆլիսն ի՞նչ է սրա մոտ, այստեղ ամեն բան լավ է: Մարդիկ խելոք են, աշխատասեր, իսկ բարոյությունն էլ մի ասա, այստեղ չար մարդ չկա: Մեկ էլ, որ այստեղ նախանձ չկա, որդի: Իսկ թիֆլիսում, oh, oh, oh, մարդ են ուտում: Եթե ժենյաս այնտեղ այսպես բախտավորվեր, ո՛ւ ո՛ւ, ամենքը նախանձից կտրաքվեին, էլ բան չէր մնալ — չհնարեն, որ աղջկաս իր մարդուց բաժանեն: Այստեղ մարդիկ ժամանակ չունին նախանձելու: Ահ, ինչ ուշացավ ժենյաս: Ես մի քիչ վառգում եմ, որդի, կներես: Ահա գալիս է:

ԵՎԳԻՆԵ. (Ներս է մտնում և նկատելով Գաբրոյին, ցնցվում է, շփոթվում և մնում անշարժ):

ՏԵՍԻՆ 4

ՆՐԱՆԸ և ԵՎԳԻՆԵ

ՀՈՒՓՍԻՄԵ. (Ծիծաղելով) Չճանաչեց:

ԵՎԳԻՆԵ. (Մոտենում է սեղանատան դռներին՝ մտածում) Երմոնո՞, (Շտապով ներս է մտնում Երմոնեն: Եվգինեն ուզում է նրան մի բան ասել, բայց մտածում է, վճռական շարժումն է անում, հետո ձեռով նշան անում նրան հեռանալու: Երմոնեն գնում է զարմացած: Չարմացած է նաև Հռիփսիմեն):

ՀՈՒՓՍԻՄԵ. Ժենյա, չե՞ս ճանաչում Գաբրիլին, մեր բարի, քաղաքավարի հարևան Գաբրո Ազարյանին:

ԳԱԲՐՈ. (Եվգինեն դուրս գալու թույլից ոտքի է վեր կացել և անշարժ կանգնած ժպտալով սպասում է նրա հայացքին) Երևի, շատ փոխվել, ծերացել եմ: (Մոտենում է և, կամենում Եվգինեի ձեռք համբուրել):

ԵՎԳԻՆԵ. (Ձեռք կամացուկ, մորից թաքուն, խլում է նրանից) Բարև ձեզ...

ՀՈՒՓՍԻՄԵ. Հիմա ճանաչեցի՞ր:

ԳԱԲՐՈ. Աչքից հեռու — մտքից ընկած. Էհ, ինչպե՞ս կիրամայեք ձեզ անվանել այժմ: Առաջ ինձ համար փոքրիկ Ժենյա էիք, իսկ այժմ Եվգենիա Պա՛վլովնա, թե՛ տիկին Ավերոյան: (Առանձին) Տեր աստված, որքա՛ն գեղեցկացել է:

ՀՈՒՓՍԻՄԵ. Գաբրոն ամեն բան լսել է Միհրանի մասին: Ժենյա, շնորհավորիր նրան, Լիզան նշանվել է:

ԵՎԳԻՆԵ. (Անտարբեր) Այո՞:

ԳԱԲՐՈ. Այո, տիկին, թե՛ նշանվել է և թե՛ շուտով պիտի ամուսնանա — գիտեմ, բայց թե երկար ժամանակ կապրի մարդու հետ — աստված գիտե:

ՀՈՒՓՍԻՄԵ. Ի՞նչ ես ասում, որդի, ա՛յ ա՛յ ա՛յ: Նստիր: Ինչ ես կանգնել...

ԳԱԲՐՈ. Մեր ժամանակում կնոջ համար մարդուց բաժանվելն ավելի հեշտ է, քան ամուսնանալը:

ՀՈՒՓՍԻՄԵ. Էհ, դու ելի առաջվա կատակասերն ես: Ժենյա, ես գնացի, բայց շուտով կգամ: (Գաբրոյին) Այսօր, երևի այստեղ կճաշես, իսկ վաղն անպատճառ իմ մոտն ես: Վեր է կենում:

ԵՎԳԻՆԵ. Մամա, աշխատիր շուտով վերադառնալ, գործ ունեմ:

ՀՈՒՓՍԻՄԵ. Լավ, լավ: (Գնում է):

ՏԵՍԻՆ 5

ԵՎԳԻՆԵ և ԳԱԲՐՈ ԱԶԱՐՅԱՆ

ԵՎԳԻՆԵ. (Ուղեկցում է մորը մինչև Նախասենյակ, սպասում է, մինչև նրա բոլորովին դուրս գնալը և դռները ծածկում, հետո մոտենում է սեղանատան դռներին, նայում դեսպի ներս, դռները ծածկում, հետո կանգնում է բեմի մեջտեղում ու նայում Գաբրոյին ոտից մինչև գլուխ):

ԳԱՐՐՈ. (Ամբողջ ժամանակ ուղի վրա աչքերով հետևում է նրան, նրա դեմքն արտահայտում է մերթ զարմացում և տարակուսանք, մերթ ուրախություն և հրճվանք) Վերջապես: (Հարձակվում է Եվգինեին համբուրելու):

ԵՎԳԻՆԵ. (Առանց տեղից շարժվելու. ձեռք բարձրացնում է այնպես խիստ, որ Ագարյանը բռնվում է տեղն ու տեղը, հետո նայում է նրան խորին արհամարհանքով, մի փոքր ժամանակ լռություն) Ես դրա համար չառանձնացա ձեզ հետ:

ԳԱՐՐՈ. (Տակավին ձևացնում է, թե չի հասկանում նրա իսկական տրամադրությունը, ժպտում է) Ներիր, մոռացա, կնոջ համար զգուշությունը կես առաքինություն է:

ԵՎԳԻՆԵ. (Մղելով ինքն իր հետ կռիվ, որպեսզի կարողանա սառնարյուն լինել) Ինչո՞ւ եք եկել:

ԳԱՐՐՈ. Ահա սիրող և հարգող բարեկամի համար ավելի քան անհասկանալի մի հարց: Ներիր, Ժենյա, չէի սպասում:

ԵՎԳԻՆԵ. (Վրդովվելով նրա սառնությունից): Մի՞ համարձակվեք ինձ հետ խոսել եզակի:

ԳԱՐՐՈ. (Փոքր ինչ շփոթվում է, սակայն իսկույն իշխում է իրան և Եվգինեի տրամադրությունը կատակի վերածում) Կարծեմ վարագույնների հետևում ոչ ոք չի թաքնված, թե՛ աղախինը սովորություն ունի դռան հետևից ականջ դնելու: Գեղեցկության թշնամին բամբասանքն է, իսկ բամբասանքի աղբյուրը — ծառաները: Մի պահեք, տիկին, հայ ծառաներ. նրանք չափից դուրս հետաքրքիր են...

ԵՎԳԻՆԵ. Թողեք ք ձեր կատակները և պատասխանեցեք ինչո՞ւ համար եք եկել:

ԳԱՐՐՈ. Չարմանալի հարց, եկել եմ ինչպես ուրիշները, գործով, պաշտոնով...

ԵՎԳԻՆԵ. Իմ տունը, այստե՞ղ:

ԳԱՐՐՈ. Ա՛, այդպես ասացեք: Այցելության: Չե՞ որ մենք բարեկամներ ենք...

ԵՎԳԻՆԵ. Ուրեմն, լսեցեք, այդ կլինի ձեր առաջին և վերջին այցելությունը: Այս մեկ: Երկրորդ՝ դուք չեք համարձակվիլ ուղե դնել իմ մոր տունը: Հասկանո՞ւմ եք: (Արտասանելով այս խոսքերը, մոտենում է լուսամուտներից մեկին և հայացքը հառում դեպի փողոց):

ԳԱՐՐՈ. (Հիասթափված, լռում է, խորհում, հետո) Արդյո՞ք, խիստ չե՞ք վարվում ինձ հետ:

ԵՎԳԻՆԵ. (Տակավին պահպանելով սառնարյունություն) Համենայն դեպս, վարվում եմ ավելի մեղմ, քան դուք վարվեցիք ինձ հետ:

ԳԱՐՐՈ. Ես ձեր վրա բռնություն գործ չեմ դրել:

ԵՎԳԻՆԵ. (Երեսն արագ դարձնելով դեպի նա) Բռնություն: Դուք ավելի լավ միջոց եք գործ դրել: Եթե լինեիք ավագակ և ինձ անպատվեիք, այսօր ես հազար անգամ պակաս կտանջեմ: Բայց ոչ, դուք հափշտակեցիք ինձ քաղցր լեզվով, որ սրից ու կրակից զորեղ է: Չեմ հերքում, դուք ինձ դուր էիք գալիս, որովհետև գեղեցիկ էիք, բայց մի մոռանաք, որ կյանքն ինձ համար մի մթին աշխարհ էր: Ճշմարիտ է, մի օր դուք ինձ թվացիք ասպետ: Այնպիսի ասպետ, որ պատրաստ էր իր կյանքը վտանգի ենթարկել մի խեղճ աղքատ — աղքիկ կրակից ազատելու: Բայց ինչ գիտեի, որ կրակը հենց դուք ինքներդ եք: (Սկսում է անցուդարձ անել):

ԳԱՐՐՈ. Չգիտեի, որ իմ սերը ձեզ համար կրակ էր:

ԵՎԳԻՆԵ. Սե՛ր: (Դառն ծիծաղ): Հա, հա, հա՛, սե՛ր: Ծաղր, խաբեություն, անարգանք և ոչ սեր: Ես մինչև այսօր չեմ կարողանում ինձ հաշիվ տալ, ինչպես պատահեց այդ: Բայց այդ օրն ես ոչ միայն հավատում էի ձեզ, այլև հաճելի էր ինձ հավատալ: Եվ դուք, օգտվելով այդ

բանից, գործ դրեցիք ձեր լեզուն, այդ թունավոր դեղը: Նա կամաց-կամաց վարակում էր արյունս, սպանում էր իմ մեջ ամոթի զգացումը, և սպանեց: (Ընկղմվում է գահավորակի վրա և երեսն ամոթից ձեռներով ծածկում):

ԳԱԲՐՈ. (Լսում է նրան, հեռվում կանգնած, հետո մի քանի քայլ մոտենում) Եվգինե, այդ բոլորն անցած բաներ են: Ինչո՞ւ եք քրքրում անցյալն և ինքներդ ձեզ տանջում: Այն օրից հետո մենք մի քանի տարի էլ եղել ենք հարևաններ և... բարեկամներ:

ԵՎԳԻՆԵ. Ես ձեզ երբեք չեմ սիրել:

ԳԱԲՐՈ. Բայց չեք էլ ասել, երբեմն միևնույն անգամ թույլ եք տվել ձեզ փաղաքշելու: Մի՞թե կարող եք հերքել այդ:

ԵՎԳԻՆԵ. (Ցնցվելով): Օո, զգվելի՜ր թուպներ:

ԳԱԲՐՈ. Ինչո՞ւ: Չզվելի կլինեի այն ժամանակ, եթե այդ օրից հետո ձեզ չհամբուրեի: Բայց ես ոչ միայն համբուրում, այլև սիրում էի ձեզ: Այո, այո, սիրում էի և, վկա է աստված, ուրախությամբ կամուսնանայի ձեզ հետ, եթե հանգամանքները ներեին: Իմ վզին մեծ լուծ կար մայրս և քույրերս: Ավելացրեք և այն, որ այդ միջոցին ես անգործ էի: Այժմ, Եվգինե, պետք է մոռանալ անցյալն և ապրել նոր զգացումներով: Դուք ժամանակակից կին եք, կրթված, զարգացած, դուք պիտի հեռու լինեք նախապաշարումներից:

ԵՎԳԻՆԵ. (Գլուխը բարձրացնելով, վեր է կենում): Յետո՞... Յետո՞...

ԳԱԲՐՈ. (Խրախուսվելով): Այն օրից անցել է ինը տարի — մի ամբողջ հավիտենականություն: Դուք տեղափոխվել եք օտար քաղաք, հաջող կերպով ամուսնացել և ահա մի տարուց ավել է, վայելում եք հանգիստ ամուսնական կյանք: Այժմ ոչ ոք չգիտե ինչ է եղել ձեր անցյալում, ոչ ոք, բացի ինձանից...

ԵՎԳԻՆԵ. (Չայրացած): Ոչ ոք: Սուտ եք ասում: Որ դուք գոնե մի անգամ պարծեցած չլինեք ձեր հաղթությամբ, դու՛ք. հա, հա, հա: Ո՞վ չգիտե, որ դուք և ձեզպեսները հենց նրա համար եք ինձ նմաններին մոլորեցնում, պատվից զրկում, որ հետո պարծենաք: Դա ձեր հերոսությունն է: Բայց բավական է: Լսեցե՛ք, ես ոչ միայն չեմ աշխատի ձեր լեզվի վրա որևէ սանձ դնել, այլ կազատեմ նրան ամեն մի սանձից: (Սկսում է անցուդարձ անել):

ԳԱԲՐՈ. (Ապշելով): Այդ ինչպե՞ս:

ԵՎԳԻՆԵ. Կարդացե՛լ եք Արաբաջյանի մասին լրագրերում:

ԳԱԲՐՈ. Ի՞նչ եք ուզում ասել:

ԵՎԳԻՆԵ. Այն, որ ես կհետևեմ այն թշվառ կնոջ օրինակին:

ԳԱԲՐՈ. Եվ կխոստովանեք ձեր ամուսնուն:

ԵՎԳԻՆԵ. Այո՛:

ԳԱԲՐՈ. (Պառուզա): Դուք չեք անիլ:

ԵՎԳԻՆԵ. Եվ ո՞վ կարգելի ինձ:

ԳԱԲՐՈ. Դուք չեք կամենալ ձեզ կործանել:

ԵՎԳԻՆԵ. Լավ է կործանվել, քան թե ապրել այնպես, ինչպես այժմ:

ԳԱԲՐՈ, ՉԷ՞ որ ձեր ամուսինը ձեզ սիրում է ու հավատում, կնշանակե նա ձեզ համարում է անարատ:

ԵՎԳԻՆԵ. Այո, բայց ես խիղճ ունիմ:

ԳԱԲՐՈ. Եվ մի՞թե այդ խիղճը թույլ կտա ձեզ մի հարվածով կործանել երեք կյանք: Ասում են ձեր ամուսինը լավ մարդ է: Եթե ձեզ չեք խնայում, խնայեցեք գոնե նրան:

ԵՎԳԻՆԵ. Խնայել խաբելով, խնայել ստորություն՝մբ, խնայել այնպես, ինչպես խնայել եմ մինչև այժմ: Օօ, ոչ, դա խնայել չի նշանակում, այլ բարոյապես կողոպտել մի ազնիվ մարդու: Գիտե՞ք ինչ ասել է խղճի խայթոց: Օօ, ոչ, եթե գիտենայիք — այս տունը ոտք չէիք դնիլ: Իսկ ես գիտեմ: Մի տարի է նա ինձ տանջում է: Սկզբում դեռ ոչինչ, որովհետև գիտակցությունս թմրած էր, որովհետև Ալվերոյանին չէր սիրում, որովհետև ամուսնացել էի նրա հետ հենց այնպես, ինչպես ամուսնանում է առհասարակ կանանց մեծ մասը: Բայց հետո սկսվեց տանջանքս, երբ սիրեցի նրան: (Թեթև պառլզա): Անցյալ օրը, երբ այստեղ խոսում էին Արաբաջյանի մասին, հազիվ զսպեցի ինձ, որպեսզի հենց հյուրերի ներկայությամբ չընկնեմ ամուսնուս ոտներիս և չասեմ. «Ես, ես մի տիկին Արաբաջյան եմ»: (Պառլզա): Բայց այն, ինչ-որ չարեցի այն օրը, կանեմ այսօր, որովհետև պարտավոր եմ անելու և չեմ կարող չանել: (Ընկղմվում է բազկաթոռի վրա և աչքերը հառում դեպի անորոշ տարածություն):

ԳԱԲՐՈ. (Մի փոքր լռությունից հետո անվստահ քայլերով մոտենում է, կանգնում նրա գլխի մոտ: Պառլզա): Ես լսել եմ, որ դուք ունիք մի սիրուն երեխա...

ԵՎԳԻՆԵ. (Ցնցվում է) Երեխա...

ԳԱԲՐՈ. Որին, երևի սիրում եք ,թե՛ դուք և թե՛ ձեր ամուսինը:

ԵՎԳԻՆԵ. Խեղճ փոքրիկ:

ԳԱԲՐՈ. Ահա հենց այդ խեղճ փոքրիկի համար դուք պիտի խնայեք ձեզ...

ԵՎԳԻՆԵ.(Տակավին ինքնամոռացության մեջ): Խեղճ Մարգո...

ԳԱԲՐՈ. Մի մոռանաք և՛ ձեր մորը...

ԵՎԳԻՆԵ. (Ուշքի գալով): Մա՛յրս,,

ԳԱԲՐՈ. Այո, այդ բարի և միամիտ կնոջը...

ԵՎԳԻՆԵ. (Արագությամբ ոտքի է կանգնում կատաղած) Որի բարեկամությունը դուք այդպես ապականեցի՞ք: Օօ, բավական է, հեռացեք...

ԳԱԲՐՈ. Կհեռանամ, իհարկե, բայց խոսք տվեք, որ չեք կատարիլ ձեր անմիտ վճիռը:

ԵՎԳԻՆԵ. Ի՞նչ, ի՞նչ իրավունքով եք պահանջում ինձնից այդպիսի խոսք:

ԳԱԲՐՈ. Սիրող մարդու իրավունքով:

ԵՎԳԻՆԵ. Սե՛ր... Մի՛ սրբապղծեք այդ բառը: Կան բերաններ, որոնք իրավունք չունեն նրան արտասանելու: (Չսպելով իր հուզումը, մոտենում է սեղանատան դռներին):

ԳԱԲՐՈ. Ի՞նչ եք կամենում անել:

ԵՎԳԻՆԵ. Կանչել աղախին, որ ձեր վերարկուն պահի:

ԳԱԲՐՈ. (Պառլզա, որի միջոցին Գաբրոյի մեջ տեղի է ունենում հոգեկան պատերազմ, նա ճանաչում է Եվգինեի հոգին): Ես կզևամ առանց աղախնի օգնության է: Բայց, աստված սիրեք, մի՛ կործանեք ձեզ: Գուք այդքան երիտասարդ եք, գեղեցիկ, կյանքը ձեզ ժպտում է, երես մի՛ դարձնեք նրանից: Եվգինե, ես ձեզ լավ չեի ճանաչում, այժմ ճանաչեցի:

Խոստովանում եմ, ես ձեզ համարում էի մեկը այն կանանցից, որոնք... որոնք... այդչափ լուրջ չեն նայում կյանքին... բայց աչքերս բացվեցին և այժմ ձեզ տեսնում եմ ձեր իսկական գույնով: Ես միտրված էի և ահա այժմ զոջում եմ... գոնե այս բանին հավատացեք..

ԵՎԳԻՆԵ.(Հեգնական դառն ծիծաղով): Հա, հա. հա, զոջում եմ, հա, հա, զոջում եմ, այդպես շուտ (Պաուզա): Բավական է, բավական է, այս րոպեին ամուսինս կարող է գալ. ես չեմ ուզում, որ գաք հանդիպեք միմյանց: Գնացե՛ք...

ԳԱԲՐՈ. (Ամոթից ընկճված) Եվգինե՛...

ԵՎԳԻՆԵ. Գնացեք, գնացեք, խնդրում եմ, ես առանց այդ էլ շատ եմ տանջվում: Մոտենում է նախասենյակի դռներին:

ԳԱԲՐՈ. Գոնե մի մեղմ հայացք, ներման մի թույլ ժպիտ:

ԵՎԳԻՆԵ.(Առանց նայելու նրան, տանջանքով ցույց է տալիս ձեռքով դռները: Գաբրոն մոտենում է դռներին, տակավին հուսալով, որ Եվգինեն կմեղմանա: Բայց տեսնելով, որ նրա դեմքի արտահայտությունը չի փոխվում, գնում է ամոթահար հանդարտ քայլերով):

ԵՎԳԻՆԵ.(Սպասում է մինչև Ազարյանի հեռանալը, ծածկում է դռները, ընկղմվում աթոռի վրա և գլուխը դնելով թևերի վրա, դառն հեկեկում է: Այնուհետև, մի վիատական շարժում անելով, ոտքի է կանգնում, աչքերը սրբում, ուշքը ժողովում, մի քանի վայրկյան անցուդարձ է անում: Հետո մոտենում է սեղանատան դռներին, բաց է անում: Ներս է մտնում աղախինը):

ՏԵՍԻԼ 6

ԵՎԳԻՆԵ և ԵՐՄՈՆԵ

ԵՎԳԻՆԵ. Դայակը վերադարձա՞վ:

ԵՐՄՈՆԵ. Իսկի էլ չէ: Կոֆեն պատրաստ է:

ԵՎԳԻՆԵ. Հավաքիր: Ես չեմ ուզում: (Պաուզա: Երմոնեն ուզում է գնալ, լսվում է գանգի ձայն): Երևի, պարոնդ է: (Երմոնեն գնում է նախասենյակի դռներով: Եվգինեն իշխում է իրան, ուշքը բոլորովին ժողովելով և նստում դաշնամուրի մոտ: Նվագում է ուրախ եղանակ):

ՏԵՍԻԼ 7

ՄԻՅՐԱՆ և ԵՎԳԻՆԵ

ՄԻՅՐԱՆ. (Հագած է ֆրակ: Նա գալիս է դատարանից և շատ ուրախ է: Դռների առջև պորտֆելը տալիս է Երմոնեին, որ իսկույն տանում է նրա առանձնասենյակը, կրկին հետ դառնում սեղանատուն):

Ահա, այդ ինձ դուր է գալիս, եթե գործից վերադառնալիս քեզ տեսնում եմ դաշնամուրի մոտ, հագնված, ուրախ, մոռանում եմ հոգևածությունս: (Մոտենում է ու համբուրում): Շարունակի՛ր, շարունակի՛ր, ես ուրախ տրամադրության մեջ եմ... մի գործ տարեցի փառահեղ կերպով: Դատարանն արդարացրեց այն անմեղ թուրքին, որին թշնամիները ցույց էին տվել իբրև եղբայրասպան: (Նստում է մոտը): Պետք է տեսնեիր, թե խեղճն ուրախությունից ինչպես էր լալիս: Օ՛ո, որպիսի հոգեկան երջանկություն է տեսնել անմեղին շղթաներից ազատված և զգալ, որ նրա ազատության մեջ դու էլ դեր ես կատարել: Նվագիր՛ր, նվագիր՛ր այդ եղանակը համապատասխանում է իմ հոգեկան տրամադրությանը...

ԵՎԳԻՆԵ.(Վերջացնելով նվագումը: Պաուզա): Շո՞գ է դրսում:

ՄԻՅՐԱՆ. Վատ չէ: Բայց երկու շաբաթ ևս և աֆրիկյան տաքերը կսկսվեն: Էհ, հոգ չէ, կփախչենք: Լսի՛ր, մայիսի մեկից մինչև սեպտեմբեր բոլոր գործերս հանձնում եմ Համազասպին և չորս ամիս քեզ հետ պտտում եմ Եվրոպայում: Այո, այո, դու պետք է տեսնես թե ինչպես են ապրում քաղաքակիրթ ազգերը: Հույս ունեմ, որ չես ասիլ, թե վատ միտք է: (Բեռները վերցնում է իր ձեռների մեջ):

ԵՎԳԵՆԵ. Մի՞թե քո գլխում կարող է վատ միտք ծագել:

ՄԻՅՐԱՆ. Օո, մի՛ ասա, երբեմն շատ՝ վատ մտքեր են ծագում: Օրինակ, այն երեկո, այն ի՞նչ հեքիաթ էր, սա՛: Աստված գիտե մի վայրկյանում ինչեր զգացի: Բայց հետո բանը հասկացա: Երեխա, ինչո՞ւ մինչև հիմա ինձանից թաքցնում էիր... (Նայում է Եվգենեի աչքերին խորհրդավոր): Մի՞թե սիրող հայր չեմ... Իհարկե, իհարկե, այդ դրության մեջ կնոջ բնավորությունը փոխվում է: Բայց, ի սեր աստծու, կապրիզներ որքան քեֆդ է ունեցիր, միայն ինձ մի վշտացրու: Եթե ոչ, գիտե՛ս, իրավաբան եմ, օրենքով կդատեմ, մեկ էլ տեսար որոշեցի — գրկել բոլոր իրավունքներից և աքսորել ոչ այնքան հեռու տեղեր, այսինքն — խոհանոց, որ ինձ համար ձվածեղ պատրաստես: Աս՛, կերթա՞ս...

ԵՎԳԵՆԵ. Ուրախությամբ: (Հեռանում է):

ՄԻՅՐԱՆ. Օ, գիտեմ, կերթաս: Դու խոհանոցից սարսափող կանանցից չես. այն կանանցից, որոնք իրենց սալոններումն են խոհարարուհի: Բայց ևս քեզ չեմ ուղարկիր: Որ այդ քնքուշ ձեռները կոշտանան: Երբեք, փառք աստծու, քո բախտից իմ գործերն այնքան լավ են գնում, որ կարող ես մեկի տեղ երեք խոհարար պահել: Սակայն... (Վեր է կենում) սաստիկ ցանկանում եմ Մարգոյին համբուրել: Հուսով եմ, որ մեր նազելի օրիորդը տանն է:

ԵՎԳԵՆԵ. Ոչ:

ՄԻՅՐԱՆ. Ա՛ա, թափառական, երբեք տանը չի նստում: Բայց եղանակը լավ է, թող ազատ օդ շնչի: Բա՛ա, , քիչ էր մնում մոռանալի: Սպասի՛ր: (Մոտենում է սեղանատան դռներին): Երմոնե՛, Երմոնե՛: Այստեղ բեր պորտֆել: (Վերադառնում է Եվգենեի մոտ: Երմոնեն բեմով անցնում է Միհրանի առանձնասենյակը): Իհարկե կտեսնես, մի թեթև սյուրպրիզ: Վաղուց է քեզ նվերներ չեմ արել: Բայց թույլ տուր կանխավճարը ստանալ... (Գրկում է Եվգենեին և համբուրում):

ԵՎԳԵՆԵ.(Առանձին): Օ՛ո, ինչ տանջանք: Աստված իմ... (Երմոնեն բերում է պորտֆելը):

ՄԻՅՐԱՆ. (Ամենելով պորտֆելը, աղախինն նշան է անում հեռանալու: Երմոնեն գնում է սեղանատան դռներով: Միհրանը բաց է անում պորտֆելը, հանում է մի քանի ակցիաներ և առաջարկում է Եվգենեին): Ահա, այս բոլորն այսօր, դատարան գնալիս, մտա «Եղիգարով և ընկերություն» գրասենյակն և գնեցի քո ու Մարգոյի անունով: Վերցրու, փոխարենը մի օժիտ, օ՛ո, ոչ, մի համբույր... (Համբուրում է):

ԵՎԳԵՆԵ. (Որ ամեն անգամ ամուսնու համբույրից ցնցվում է, վերցնում է թղթերը, նայում): Ի՞նչ բաներ են:

ՄԻՅՐԱՆ. Նավթային ընկերության ակցիաներ:

ԵՎԳԵՆԵ. Ոչինչ չեմ հասկանում այս թղթերից: (Դնում է թղթերը դաշնամուրի վրա):

ՄԻՅՐԱՆ. Զո ի՞նչ բանն է: Դու ուրիշ հոգով ես կրթված: Հայրդ գինվորական է եղել: Նա քո մոտ միշտ խոսել է հրացանների ու թնդանոթների մասին: Բայց, սիրելիս, ժամանակիս զորեղ զենքերից մեկն էլ այդ թղթերն են: Պահիր քեզ համար, տարվա վերջը դիվիդենտ կստանաս: (Ուզում է գրկել):

ԵՎԳԵՆԵ.(Հետ է քաշվում) Ա՛հ...

ՄԻՅՐԱՆ. Դու չես ուզում, որ քեզ համբուրեմ:

ԵՎԳԻՆԵ.(Ճիգ է անում ժպտալ): Այո, չեմ ուզում:

ՄԻՅՐԱՆ. Աա՛. հասկանում եմ, դու ինքդ ես ուզում համբուրել:

ԵՎԳԻՆԵ.(Ոտքի կանգնելով) Աստված իմ, այլևս ուժ չմնաց ինձանում...

ՄԻՅՐԱՆ. (Նկատելով նրա այլայլվելը): Ի՞նչ ասացիր... ուժ չմնա՞ց,...

ԵՎԳԻՆԵ. (Նայելով լուսամուտով դեպի փողոց): Այո, չմնաց,...

ՄԻՅՐԱՆ. (Ոտքի կանգնելով) Եվգինե՛...

ԵՎԳԻՆԵ.(Երեսը դարձնելով նրան) Ի՞նչ ես կամենում ինձանից, ի՞նչ...

ՄԻՅՐԱՆ. Եթե հիվանդ ես, պիտի բժիշկ հրավիրել (Ուզում է մոտենալ դռներին):

ԵՎԳԻՆԵ. Ոչ, ոչ, հարկավոր չէ: Օո, երանի թե հիվանդ լինեի:

ՄԻՅՐԱՆ. Ասա, ի՞նչ է պատահել: Կարելի է ազգականներիդ մասին վատ լուր ես լսել, գուցե մայրդ հիվանդ է կամ մի կարիք ունի: Ասա, չէ՞ որ ես քեզ համար ոչինչ չեմ խնայում: Եվգինե՛... (Գրկում է):

ԵՎԳԻՆԵ. (Ազատվելով նրա գրկից) Թո՛ղ, մի՛ գրկիր ինձ...

ՄԻՅՐԱՆ. (Ավելի ու ավելի զարմանալով, դարձյալ մոտենում է նրան ու գրկում: Այս անգամ Եվգինեն ուղղակի հրում է նրան): Դու ինձ հրո՞ւմ ես:

ԵՎԳԻՆԵ. Ոչ — քեզ, այլ ինձ եմ հրում քեզանից, ի՞նձ...

ՄԻՅՐԱՆ. Եվ դա... կատակ է...

ԵՎԳԻՆԵ. Կատա՞կ... տանջանք է:

ՄԻՅՐԱՆ. Ո՞վ է տանջվում, ինչո՞ւ:

ԵՎԳԻՆԵ. Նա, որ արժանի է տանջվելու և շուտով նա, որ արժանի չէ... (Արտասանում է խուլ ձայնով, հագիվ զսպելով հեկեկանքը):

ՄԻՅՐԱՆ. (Ճակատը շփելով): Ահա հանելուկ... «Նա, որ արժանի է և շուտով նա, որ արժանի — չէ»: Ոչինչ չեմ հասկանում, ոչինչ... բայց... դու սխալվում ես, դու հիվանդ ես, զառանցում ես... Եվգինե, վատ մտքեր են ծագում գլխումս, իմ մեջ կասկածներ են հղանում... պարզ խոսիր... (Եվգինեն լուռ է): Վերջապես այդ չափից դուրս է... (Մոտենում է և բռնում նրա ձեռքը):

ԵՎԳԻՆԵ. (Նայելով Միհրանին վշտալի հայացքով): Եվ ինչո՞ւ: Ինչու դու ուրիշ մարդ չես, կոպիտ, գռեհիկ, չար մարդ: (Ձեռն անջատում է նրա ձեռից և հեռանում):

ՄԻՅՐԱՆ. (Ապշած բևեռվում է միևնույն տեղում, աչքերը հառելով Եվգինեի վրա: Պազուա): Ա՛ա....

ԵՎԳԻՆԵ.(Պաուզա): Ինչո՞վ պիտի վարձատրեմ քո բոլոր բարությունները, եթե ոչ... անկեղծությամբ: Այո, այո, միմիայն անկեղծությամբ: Մի՛ նայիր ինձ այդպես, քո հայացքն ինձ կսպանե ...

ՄԻՅՐԱՆ. Վախենո՞ւմ ես, այո՞, վախենում ես: (Լռում է և շարունակ նայում):

ԵՎԳԻՆԵ. (Մի քանի վայրկյան անցուդարձ անելով, հանկարծ կանգ է առնում նրա առջև): Մի հարց... (ճակատը շփելով, պաուզայից հետո վճռական շարժումն է անում): Այն երեկո դու ասում էիր, եթե դու լինեիր Արաբաջյանի տեղը, կներեիր կնոջդ անցյալը...

ՄԻՅՐԱՆ. Ասում էի, հետո՞...

ԵՎԳԻՆԵ. Արդյոք, համոզմունքով էիր ասում:

ՄԻՅՐԱՆ. Այդ ի՞նչ հարց է... (Պաուզա: Ձայնը բարձրացնում է): Այդ ի՞նչ հարց է... (Պաուզա: Բռնում է Եվգինեի ձեռն և ուժգին թոթափում): Ինչ հարց է ա՛յդ...

ԵՎԳԻՆԵ. Օո, ինչ ամուր ես սեղմում ձեռս, դու երկաթի ուժ ունիս:

ՄԻՅՐԱՆ. (Տակավին բաց չթողնելով նրա ձեռը): Ասա, ինչո՞ւ ես հարցնում...

ԵՎԳԻՆԵ. Հարցնում եմ նրա համար, որ ես... ես... մի անպիտան կին եմ, ես... արժանի չեմ... որ ես մի... մի տիկին Արաբաջյան եմ...

(Արտասանելով այս բառերը, ձեռն, ազատում է Միհրանի ձեռից և թուլացած ընկնում է թախտի վրա: Երկարատև պաուզա, որի ժամանակ Միհրանը քարացած կանգնած է միևնույն տեղ, մի ուժեղ ցնցումից հետո: Իսկ Եվգինեն երկու ձեռներով երեսը ծածկած է: Վերջապես, Միհրանը շփում է աչքերը, նայում շուրջը, հետո ինքն իրան, կարծես, հավաստիանալու համար՝ երազումն է, թե արթուն):

ՄԻՅՐԱՆ. Այս ի՞նչ է... երազ.. թե՞... ցնորվել եմ... Բայց... կարծեմ, խելքս գլխիս է... Ահա նա, ահա մեր... հյուրասենյակը, ծանոթ իրեր... Օրը ցերեկով... Իմ փաղաքշանքներից հետո... Հենց այստեղ, ինքն իր լեզվով: (Մոտենում է ու ձեռը բռնում): Հետ վերցրու ասածդ.. հետ վերցրու:

ԵՎԳԻՆԵ. Հագիվ կարողացել եմ ասել:

ՄԻՅՐԱՆ. (Թոթափելով նրա ձեռը ուժգին): Ուրեմն կատա՞կ չի այդ...

ԵՎԳԻՆԵ. (Խորին տանջանքով երեսը դարձնում է նրանից): Ո՞վ կարող է յուր ճակատագրի հետ այդպիսի կատակ անել: (Ձեռն ազատում է ու քայլերն ուղղում դեպի ննջարան):

ՄԻՅՐԱՆ. (Կտրելով նրա ճանապարհը): Ոչ, ոչ, ոչ, ասա, որ ինձ փորձում էիր ասա, որ ցնորված ես: Դեհ, ասա ... Աղաչում եմ, լսում ես, չեմ ստիպում, այլ աղաչում եմ, աղերսում եմ, լսի՛ր: Ես տանջվում եմ... Ժպտա, որ իմանամ, թե սուտ էր, որ ինձ փորձում էիր... Ես կտամ քեզ ամբողջ կյանքս մի վայրկյանում, միայն հերքիր, հերքիր ասածդ...

ԵՎԳԻՆԵ. Ես բոլորն ասացի:

ՄԻՅՐԱՆ. Ուրեմն չե՞ս հերքում... չե՞ս հերքում... Աա, զարշելի... (Ուզում է հարձակվել նրա վրա, բայց վայրկյանաբար զսպում է իրան): Գազա՛նը, գազա՛նը պիտի զսպել: (Ներս են մտնում տիկ. Հռիփսիմեն և տիկ. Մարթան դրսի հագուստով և ապշած մնում):

ՄԻՅՐԱՆ. (Հեկեկալով փաթաթվում է քրոջ պարանոցին): Մա՛րթա, Մա՛րթա...

ԵՎԳԻՆԵ. (Ընկնում է մոր գիրկը):

Մարթան, կարծես, իրողությունը գուշակած, ատելությամբ լի հայացքով նայում է Եվգինեին: Իսկ Հռիփսիմեն ոչինչ չհասկանալով, ապշած նայում է Միհրանին:

Վարագույրն իջնում է հանդարտ

Արարված Գ

Բեմը ներկայացնում է Միհրանի ընդարձակ առանձնասենյակը: Երկու դուռ — խորքում և ձախ: Խորքինը տանում է նախասենյակ, որի մյուս կողմում է Միհրանի փաստաբանական գրասենյակը, ձախինը տանում է հյուրասենյակ: Աջ պատի վրա՝ դեպի փողոց լուսամուտներ: Տնեցիներն մուտք ունին ձախի դռներից: Աջ պատի տակ դրած է Միհրանի գրասեղանը, վրեն հեռախոսի ապարատ, թանաքաման, թղթեր, պաշտոնական գործեր, խորքի պատի տակ գրքերի պահարան դարակներով, քովը երկաթե դրամարկո: Ձախ կողմում կաշվեծածկ գահավորակ և բազկաթոռներ, սեղան, վրեն ամսագրեր: Մի տուփ՝ ծխախոտով և այլն: Հատակին սփռած է պարսկական գորգ: Պատերին մի քանի գրավյուրներ և մի քանի թատրոնական նշանավոր գործիչների, նաև եվրոպական հռետորների պատկերներ:

ՏԵՍԻՆ 1

ՎԱՐՍԱՄՅԱՆ ԵՎ ԳՐԱԳԻՐ

Վարագույրը բարձրանալիս Վարսամյանը, Միհրանի գրասեղանի մոտ կանգնած, թղթերի մեջ փնտրում է ինչ որ թուղթ, իսկ գրագիրը մի թերթ ձեռին, գրիչն ականջի վրա դրած, կանգնած է խորքի դռների առջև: Մի քանի վայրկյան լռություն:

ՎԱՐՍԱՄՅԱՆ. Չգիտեմ որտեղ է դրել նա այն թուղթը: (Դադարում է փնտրել) Լավ, առայժմ արտագրեցեք այդ խնդիրը, ինքը կգա կհարցնեմ:

ԳՐԱԳԻՐ. (Երեսը դարձնում է դուրս գնալու, իսկույն հետ է դառնում: Պաուզա):
Գրասենյակում մի քանի այցելուներ են սպասում:

ՎԱՐՍԱՄՅԱՆ. Իսկույն կգամ:

ԳՐԱԳԻՐ. Նրանք ուզում են անձամբ պարոն Ավերդյանին տեսնել:

ՎԱՐՍԱՄՅԱՆ, Ասացեք, որ Ավերդյանն ոչ ոքի չի ընդունում:

(Գրագիրը գնում է: Վարսամյանը, գրասեղանի մոտ կանգնած, ձեռքը հենում է հակատին և մտածում: Խորքի դռներից ներս է մտնում Սառափյանը):

ՏԵՍԻՆ 2

ՎԱՐՍԱՄՅԱՆ և ՍԱՌԱՓՅԱՆ

ՍԱՌԱՓՅԱՆ. (Ճակատը թաշկինակով սրբելով): Ահա քեզ և գարնան սկիզբ, արդեն տաքն զգալի է: (Բարևելով): Հըմ, Էլի միևնույն տրամադրության մեջ է մեր պարոնը:

ՎԱՐՍԱՄՅԱՆ. Անփոփոխ:

ՍԱՌԱՓՅԱՆ. Չարմանալի է. հասկանալ չեմ կարող ինչ է պատահել այս տանը: Միհրանը խոմ այդպես է: Մարթային խոսեցնել չի լինում, իսկ Եվգինեն իր ննջարանից դուրս չի գալիս: Պետք է, վերջապես, պատճառն իմանալ: (Բայլերին ուղղում է դեպի ձախի դռները):

ՎԱՐՍԱՄՅԱՆ. Կարծեմ հրամայված է ոչ ոքի չընդունել:

ՍԱՌԱՓՅԱՆ. Ահա թե ինչ: Տարօրինակ է, տարօրինակ, ոչինչ չեմ հասկանում: Ահա, ով որ գալիս է: (Ձախ դռներից ներս է մտնում Մարթան խիստ դեմքով):

ՏԵՍԻՆ 3

ՆՐԱՆՔ և ՄԱՐԹԱ

ՄԱՐԹԱ. (Գլխով սառն պատասխանելով Սառափյանի բարևին, դառնում է Վարսամյանին): Թիֆլիսի լրագրերը ստացվել են:

ՎԱՐՍԱՄՅԱՆ (Ցույց տալով գահավորակի առջև դրած սեղանը) Բոլորն այնտեղ է:

(Մարթան մոտենում է սեղանին, լրագրերը վերցնում և քայլերն ուղղում դեպի ձախի դռները):

ՍԱՌԱՓՅԱՆ. Եվգինեին կարելի՞ է տեսնել քույր Մարթա:

ՄԱՐԹԱ. (Սառն): Հարցրեք աղախինին: (Գնում է):

ՍԱՌԱՓՅԱՆ. (Վարսամյանին): Տեսա՞ր, Էհ... ոչ, պետք է ինչպես և է ծանոթանալ այդ կոմեդիայի բովանդակությանը:

ՎԱՐՍԱՄՅԱՆ. Լավ է , եթե կոմեդիա է և ոչ դրամա...

ՍԱՌԱՓՅԱՆ. Ինչ ասացի՞ր...

ՎԱՐՍԱՄՅԱՆ. Ոչինչ... (Ձախ դռներից գալիս է Հռիփսիմեն Եվգինեի մայրը՝ տխուր և հուզված):

ՏԵՍԻՆ 4

ՆՐԱՆՔ և տիկին ՀՌԻՓՍԻՄԵ

ՀՌԻՓՍԻՄԵ. Միհրանն այստե՞ղ չէ: (Տեսնելով Սառափյանին): Արշակ, լավ է, որ քեզ տեսա: Դու ինձ հարկավոր ես:

ՍԱՌԱՓՅԱՆ. Փառք աստծու, ես էլ մեկին հարկավոր եղա: Հրամայիր, հորաքույր...

ՀՌԻՓՍԻՄԵ. Գիտես ինչ... բայց (նայում է Վարսամյանին, որ այդ միջոցին գրասեղանի մոտ կանգնած ինչ-որ գրում է շտապով մի կտոր թղթի վրա)... Բարով, որդի...

ՎԱՐՍԱՄՅԱՆ. (Գլուխ տալով): Ես ձեզ չեմ խանգարիլ: Վերջացրի: (Գրիչը թողնում է սեղանի վրա, վերցնելով դրած թուղթը): Արշակ, եթե Միհրանը հարցնի իմ մասին, ասա՝ գրասենյակումն եմ: (Գլուխ տալով Հռիփսիմեին, գնում է խորքի դռներով):

ՀՌԻՓՍԻՄԵ. Ինչ հասկացող տղա է: Ա՛խ, Արշակ, ես անբախտ եմ: Օգնի՛ր, այս քաղաքում, բացի քեզանից, մոտիկ ազգական չունիմ...

ՍԱՌԱՓՅԱՆ. Ի՛նչ է պատահել...

ՀՌԻՓՍԻՄԵ. Մի՛ հարցնիլ, որդի, ոչ մի բան մի հարցնիլ, միայն օգնիր...

ՍԱՌԱՓՅԱՆ. Բայց ի՞նչպես օգնեմ, ո՞ւմ օգնեմ, երբ ոչինչ չեմ հասկանում:

ՀՌԻՓՍԻՄԵ. Չի էլ հարկավոր, որ հասկանաս, որդի, դու միայն, ահ... ցը՛ր ... այո՛ւ, ասա Միհրանին, ասա., որ... մի խոսքով հաշտեցրու նրան...

ՍԱՌԱՓՅԱՆ. Ո՞րն է հետ հաշտեցնում:

ՀՌԻՓՍԻՄԵ. Ժենյայի:

ՍԱՌԱՓՅԱՆ. (Չարմացած): Միհրանը կռվել է Եվգինեի հե՞տ... Քարերը կտրաքեն... երկինքը կպատռվի:

ՀՌԻՓՍԻՄԵ. Չեն կռվել որդի, այլ, այլ... ինչպես ասեմ: (Առանձին): Ախ, ինչ դժվար է գաղտնիք պահել... (Նրան). Գիտե՞ս ինչ, որդի, ասա Միհրանին, որ սուտ է, որ Ժենյայի... խելքը գլխին չէ... փորձում է... մի խոսքով, հանգստացրու նրան... (Սկսում է լաց լինել):

ՍԱՌԱՓՅԱՆ. (Ձեռք ճակատին զարնելով): Աա, հիմա հասկացա... Մի խոսքով ասա, վերջացրու էի... Եվգինեին զրպարտել են:

ՀՌԻՓՍԻՄԵ. Չրպարտել են, իհարկե, զրպարտել են...

ՍԱՌԱՓՅԱՆ. Լուր են տարածել, որ նրա անցյալը նման է Արաբաջյանի անցյալին... Եվ տարածողն է տիկին Գալամբարյանը:

ՀՌԻՓՍԻՄԵ. Ի՞նչ, դու մի բան լսե՞լ ես:

ՍԱՌԱՓՅԱՆ. Այո՛, լսել եմ:

ՀՌԻՓՍԻՄԵ. Ուրեմն, խոսո՞ւմ են:

ՏՍԱՌԱՓՅԱՆ. Խոսում են:

ՀՌԻՓՍԻՄԵ. (Թուլանում ընկղմվում է գահավորակի վրա): Տունս քանդվեց...

ՍԱՌԱՓՅԱՆ. (Բռնելով նրա ձեռքը): Լավ, ուշքի եկ, հորաքույր... Աշխարհում չի գտնվիլ մի ցինիկ, որ հավատա այդ զրպարտությանը:

ՀՌԻՓՍԻՄԵ, Բայց ի՞նչ անեմ, որդի, ի՞նչ անեմ, աղջիկս ձեռքիցս գնում է, բախտս ջուրն է ընկնում...

ՍԱՌԱՓՅԱՆ. Վեր կաց, հորաքույր, քայլերի ձայներ եմ լսում: Չպիտի աղմուկ բարձրացնել:

ՀՌԻՓՍԻՄԵ. (Վեր կենալով): Այո, այո, չպիտի աղմուկ բարձրացնել... երևի, Մարթան է գալիս... օօ, ես չեմ կարող նրա երեսը տեսնել, նա ուզում է հետս կռվել: Այս դռներով կգնամ... (Գնում է խորքի դռներով):

ՏԵՍԻԼ 5

ՄԻՋՐԱՆ և ՍԱՌԱՓՅԱՆ

ՄԻՋՐԱՆ. (Ներս է մտնում տնային պիջակով, գիշերային շապկով, օձիքը վերև բարձրացրած: Նա գալիս է ննջարանից և երևում է, որ գիշերն անքուն է անցկացրել: Մտքերի մեջ խորասուզված, չնկատելով Սառափյանին, մոտենում է գրասեղանին, նայում թղթերին, հետո մոտենում է գրքերի պահարանին, այնտեղ ևս ինչ-որ որոնում և ապա դարձյալ մոտենում է գրասեղանին: Այս ամբողջ ժամանակ Սառափյանը տարակուսած նայում է նրան մերթ ընդ մերթ գլուխը երերելով):

ՍԱՌԱՓՅԱՆ. (Պառուզա. մոտենում է): Ինչ երկա՛ր ես քնում:

ՄԻՋՐԱՆ. (Սթափվելով): Աա, այդ դո՛ւ ես... այդպես վա՞ր դ...

ՍԱՌԱՓՅԱՆ. Լավ վաղ է... արդեն մեկ ժամն է:

ՄԻՅՐԱՆ. (Մեքենայաբար): Արդեն մեկ ժամն է: (Նստում է գրասեղանի քով, բաց անում արկղներից մեկը) Այս ի՞նչ է այստեղ: (Հանում է արկղից մի ձևովեր): Այս ինձ նվիրել է, ով, այո, այո, այն թուրք բեզը, որի եղբորը պաշտպանեցի: Ինչո՞ւ... անցան այն ժամանակները, երբ մարդիկ կյանքի բարդ խնդիրները լուծում էին զենքով, իսկ այժմ... (Արհամարհանքով ձևովերը դնում է սեղանի վրա և շարունակում արկղում որոնել): Վերցրո՛ւ, նվիրում եմ քեզ, հարկավոր կգա, դու նախկին զինվորական ես:

ՍԱՌԱՓՅԱՆ. (Վերցնում է ձևովերն ու նայում): Հիանալի ուղևորներ է, ամերիկական վերջին սիստեմայի... (Դնելով գրպանը) Շնորհակալ եմ: (Պաուզա): Չբաղվա՞ծ ես...

ՄԻՅՐԱՆ. (Շարունակ որոնելով արկղի մեջ): Գո՞րծ ունիս հետս...

ՍԱՌԱՓՅԱՆ. Ուզում էի առաջարկել մի քիչ զբոսնելու ինձ հետ: Եղանակը վատ չէ, թեև մի քիչ տաք է:

ՄԻՅՐԱՆ. Ես ցերեկները ե՞րբ եմ զբոսնել... (Հանում է արկղից մի թուղթ, նայում է վերնագրին, վեր է կենում, մոտենում խորքի դռներին): Ո՞վ կա այստեղ: (Գալիս է գրագիրը): Այս թուղթ վաղը կարտագրեք և կներկայացնեք դատարանին:

ԳՐԱԳԻՐ. Հա, հենց մենք էլ այդ էինք փնտրում: (Վերցնում է թուղթը):

ՄԻՅՐԱՆ. Մեկ ժամն է, կողպեցեք գրասենյակն ու գնացեք: (Գրագիրը գնում է): Չարմանալի ողորմելի Էսկաներ կան աշխարհում, այդ ապուշը, միևնույն ամեն օր չարձակեմ պարապմունքից, ինքնագլուխ չի գնա: Կարծես, այդ ստրկական պաշտոնը հաճելի է նրա համար: (Սառափյանին դառնում պաուզայից հետո): Է՛լ ինչ կասես...

ՍԱՌԱՓՅԱՆ. Ոչի՞նչ...

ՄԻՅՐԱՆ. Այդ քիչ է... Բայց դեմքդ ցույց է տալիս, որ մի բան ուզում ես ասել, ի՞նչ էր խնդրում քեզանից հորաքույրդ:

ՍԱՌԱՓՅԱՆ. (Չարմանալով ու շփոթվելով): Հորաքույրս...

ՄԻՅՐԱՆ. Այո, իմ զոքանչը... Չե՞ որ մի փոքր առաջ նա այստեղ լալիս էր քո առջև: (Նայելով նրան խորհրդավոր): Երբեմն մարդ կարող է պատի հետևից էլ զգալ, թե ինչ են խոսում իր մասին: (Մտածում է): Բայց ինձ համար միևնույն է, ինչ ուզում են — թող խոսեն: Հասկանում եք, միևնույն է... (Ձեռով մի շարժումն անելով, դարձյալ նստում է գրասեղանի քով: Խորքի դռներից ներս են մտնում Սուլթանյանը և Վարսամյանը):

ՏԵՍԻՆ 6

ՄԻՅՐԱՆ, ՍՈՒԼԹԱՆՅԱՆ, ՍԱՌԱՓՅԱՆ և ՎԱՐՍԱՄՅԱՆ

ՄԻՅՐԱՆ. (Տեսնելով նրանց, աշխատում է ձևանալ անհոգ ու զվարթ): Ա՛հ, կովկասյան ամերիկացի, բարով: Ի՞նչ է ասում քո գործնական փիլիսոփայությունը...

ՍՈՒԼԹԱՆՅԱՆ. Իմ գործնական փիլիսոփայությունը պատվիրում է ինձ՝ ներկայացնել քեզ ամերիկական հաշիվ և պահանջել քեզանից կորցրած ժամանակիս համար վարձ: Այդ ի՞նչ է պատահել, բարեկամ, զեներալի չին ես ստացել, թե՞ մինիստրի պաշտոն, ահա երրորդ անգամն է գալիս եմ, ասում են, «չի ընդունում»... (Նստում է գրասեղանի քով: Պաուզա): Ծանոթացա՞ր իմ մեքենապետի գործի հետ: Բա՞ն այդ ինչ է, դու նիհարել ես, կարծես, ծերացել... Ի՞նչ է պատահել....

ՄԻՅՐԱՆ. Ծանոթացա քո մեքենապետի գործի հետ:

ՍՈՒԼԹԱՆՅԱՆ. Չըմ, հույս կամ, որ նրան արդարացնեն:

ՄԻՅՐԱՆ. (Առանց նրան նայելու, դեպի անորոշ տարածություն): Խեղճ մարդ:
(Վարսամյանին և Սառափյանին): Երևակայեցեք մի համեստ և աշխատասեր մարդ: Նա ունի
մի երիտասարդ կին — գեղեցիկ և ոչ հիմար, բարոյական, բայց վերին աստիճանի
կենսասեր: (Հառաչանքով զսպելով): Ամուսիններն ապրում են հանգիստ և երջանիկ:
(Հուզվում է: Պաուզա): Ասպարեզ է գալիս մի ինչ-որ ֆրանտ, երկար ժամանակ հետամուտ է
լինում գեղեցիկ կնոջը: Երկու տարի կինը մաքառում է նրա հրապույրներիդ դեմ, վերջը
(հուզումը զսպելով)... մոլորվում է... և կորցնում է խելքը...

ՍՈՒԼԹԱՆՅԱՆ. Արի ու հասկացիր կնոջ հոգեբանությունը:

ՄԻՅՐԱՆ. Մարդն իմանում է իր անպատվությունը և կնոջը նախազգուշացնում: Կինն առաջ
հերքում է, հետո հանձն առնում հանցանքը և խոստանում է ձեռք վերցնել մոլորությունից...
Բայց չի կարողանում: Երեք տարի մարդը տանջվում է, կարող էր երևակայել ինչպես:
(Սուլթանյանին): Գործին կպած է նրա հիշատակարանը՝ դա տառապող հոգու մի ամբողջ
տրագեդիա է: (Չսպելով հուզմունքը, նորից դառնում է Սառափյանին և Վարսամյանին): Մի
օր նա, որսից վերադառնալով, հանդիպում է կնոջը սիրականի գրկում...

ՍԱՌԱՓՅԱՆ. Եվ իսկույն, իհարկե, ֆրանտին սպանում...

ՄԻՅՐԱՆ. (Հառաչելով): Օ, երջանկությունը մարդու համար այնքան հազվագյուտ բան է, որ
երբ ձեռքն է ընկնում, ատամներով է պահում նրան: Այդ ամուսինը դեռ հույս է ունենում իր
ընտանեկան հանգստությունը վերականգնելու: Նա զսպում է իրան: Այնինչ ֆրանտը
կարծելով, որ հասել է իր վերջին ժամը, գրպանից հանում է մի դանակ պաշտպանվելու
համար: Ամուսինն ասում է նրան, «հեռացիր, ես չեմ ուզում մարդասպան դառնալ»: Սակայն
ֆրանտը թույլ է տալիս իրան մի արհամարհական ծիծաղ: Եվ ահա այդ ծիծաղը, իբրև լկտի
անարգանք, կտրում է անպատվածի համբերությունը. թշվառն արձակում է հրացանը, և
ֆրանտը թավալվում է իր սիրուհու ոտների տակ:

ՎԱՐՍԱՄՅԱՆ. (Պաուզա): Եվ այժմ կինը ողբում է իր սիրեկանին, իհարկե:

ՍՈՒԼԹԱՆՅԱՆ. Ընդհակառակը, նա լալիս է իր ամուսնու մասին: Եվ հենց նա ինքն է ինձ
խնդրել մի լավ փաստաբան վարձել իր մարդու համար:

ՎԱՐՍԱՄՅԱՆ. Ահա այստեղ կարող էիր ասել, «արի ու հասկացիր կնոջ հոգեբանությունը»:
(Միհրանին): Բայց ես զարմանում եմ, ահա երեք տարի է քո օգնականն եմ և չեմ հիշում, որ
մի գործ քեզ այնքան հուզած լինի, որքան այդ մեքենապետի գործը...

ՄԻՅՐԱՆ. (Անցուդարձ անելով): Ինձ հուզում են այդ մարդու քաշած տանջանքները: Որքան
համբերություն, որքան հոգեկան ուժ պետք է ունենա մի մարդ, որ կարողանա զսպել իր մեջ
զագանին երեք տարի շարունակ... Իսկ նա մի հասարակ մեքենապետ է, գրեթե անկիրթ...

ՍՈՒԼԹԱՆՅԱՆ. Իմ կարծիքով, աշխարհում երկու տեսակ մարդիկ գիտեն հերոսաբար կրել
իրանց վիշտը — փիլիսոփաները և աշխատանքի մարդիկ: Եվ դրանք են կազմում
մարդկության բարոյական արիստոկրատիան: Մյուսները միջին էակներ են և խաղալիք
իրանց ճակատագրի հաճույքին...

ՄԻՅՐԱՆ. (Նայելով Սուլթանյանին խոր և տարօրինակ հայացքով) Այո:

ՍՈՒԼԹԱՆՅԱՆ. Այո: Ով երկնքում չի սավառնում մտքերով կամ ամբողջ եռությամբ կպած չէ
երկրին, ծառի ճյուղի պես երերվում է ամեն մի թեթև հողմից... Ինչպե՞ս, ես շատ ուրախ եմ, որ
իմ մեքենապետի գործն այդքան քեզ հուզել է, այդ կնշանակե, որ դու նրան կպաշտպանես
զգացումով: Շատ ուրախ եմ: Դեհ, ցտեսություն, ես գնամ թշվառի ընտանիքին

ուրախացնեմ, որ հույս կա նրան արդարացնելու: (Դառնալով Սառափյանին): Իսկ հետո ուզում եմ քեզ հետ «Եվրոպա» հյուրանոցում մի լավ ճաշել: Գնանք:

ՍԱՌԱՓՅԱՆ. Ահա այդ բարձր է ամեն մի փիլիսոփայությունից (Միհրանին): Ցտեսություն: (Վարսամյանին) Մտածիր որքան կամենում ես խորը, բայց մի սպասիր կյանքից կատարյալ երջանկություն, այլ վերցրու այն, ինչ որ տալիս է. թեկուզ մի ուրախ ճաշ շամպանիայով: (Սուլթանյանին) Ես քո խոնարհ ծառան: Ցտեսություն. (Սառափյանը և Սուլթանյանը գնում են խորքի դռներով):

ՏԵՍԻՆ 7

ՄԻՋՐԱՆ և ՎԱՐՍԱՄՅԱՆ

ՄԻՋՐԱՆ. (Մտքերի մեջ խորասուզված մի քանի վայրկյան լուռ, անցուդարձ է անում: Պառուզա): Ի՞նչ ես կարծում եմ իրավացի՞ է:

ՎԱՐՍԱՄՅԱՆ. Ո՞վ:

ՄԻՋՐԱՆ. Սուլթանյանը, նա ասում է, ով երկնքում չի սավառնում կամ երկրին կպած չի իր ամբողջ եղբայր, երեքում է ամենաթեթև հողմից:

ՎԱՐՍԱՄՅԱՆ. (Որ շարունակ նայում է յուրաքանչյուր շարժմանը): Նա մի բանում իրավացի է, այն է՝ աշխատանքի մարդիկ ավելի հեշտությամբ են կրում իրենց վիշտը: Այո, ես կարծում եմ, չկա վիշտ, որին կարելի չլիներ խեղդել աշխատանք ասված առյուծի ճիրաններով: Այս տեսակետից զարմանալի է ինձ համար քո վերջին ժամանակվա ծուլությունը...

ՄԻՋՐԱՆ. (Հանկարծ կանգ առնելով, նայում է նրան խորը-խորը): Ինչո՞ւ ես այդ ասում:

ՎԱՐՍԱՄՅԱՆ. (Շփոթվելով) Դու փախչում ես աշխատանքից:

ՄԻՋՐԱՆ. Բայց ես վիշտ չունեմ:

ՎԱՐՍԱՄՅԱՆ. (Կամենալով ուղղել իր անզգուշությունը) Ես այդ չեի ուզում ասել: Ահա մոտ երկու շաբաթ է, դու գործով չես հետաքրքրվում, ոչ ոքի չես ուզում ընդունել: Եթե այսպես շարունակես, շուտով մենք կգրկվենք կլիենտներից:

ՄԻՋՐԱՆ. Եվ այդ քեզ շա՞տ կտխրեցնի:

ՎԱՐՍԱՄՅԱՆ. Այո, որովհետև դու կարող ես կորցնել տարիների ընթացքում ձեռք բերած հռչակը...

ՄԻՋՐԱՆ. (Դառն ծիծաղելով): Հռչակ, հա, հա, հա, հռչակ: Մի՞թե որևէ հռչակ կամ լավ անուն կարող է մարդուն բախտավորեցնել: Մարդու այստեղը (խփելով կրծքին) պիտի հանգիստ լինի... այստեղը...

ՎԱՐՍԱՄՅԱՆ. Ես կարծում եմ, երբ մարդ կատարում է իր պարտականությունները, նրա սիրտը միշտ հանգիստ պիտի լինի...

ՄԻՋՐԱՆ. Մի՞թե, միամիտ և մաքուր երիտասարդի խոսքեր: Բայց, ասա՛ ինձ, շատ մարդիկ են ընդունակ կատարելու իրենց պարտականությունները, ասա՛ շատ մարդիկ: (Կանգնելով նրա դեմ ու դեմ ու նայելով ուղիղ աչքերին): Համազասպ, ես գիտեմ ինչ ես ուզում ասել, ինչ ես մտածում այս րոպեին, այո՛, այո՛, գիտեմ ինչ պարտականության մասին է խոսքը: Դու ինձ մեղադրում ես մտքումդ, այնպես չէ, համարում ես ինձ թուլամորթ, այո՛, ասա՛: Ինչո՞ւ ես երեսդ դարձնում, մի՞թե ես հիմար եմ, մի՞թե չգիտեմ՝ բարեկամիս աչքերի մեջ կարդալ նրա

մտքերը: Այո, այո, դու ամեն բան գիտես, միայն համեստությունը, այդ կեղծ զգացումը թույլ չի տալիս քեզ ինձ բացարձակ հանդիմանելու:

ՎԱՐՍԱՄՅԱՆ. Միհրան:

ՄԻՅՐԱՆ. Չուր մի կեղծիր, Համազասպ: Մեր բարոյական հայացքները միևնույնն են, և այսքանը բավական է: Սակայն գաղափարների և իրականության մեջ կա ահագին խորխորատ: Գիտեմ, դու ուզում ես, որ ես հերոսաբար անցնեմ այդ խորխորատը: Կանցնեմ, կանցնեմ, տալիս եմ քեզ ազնիվ խոսք:

ՎԱՐՍԱՄՅԱՆ. (Ուրախանալով): Այո՛, հուսամ... Բայց և, այդպես էլ համոզված էի, ուրիշ կերպ չէր կարող լիներ:

ՄԻՅՐԱՆ. Այն երեկո — հիշո՞ւմ ես — երբ դու խոսում էիր Արաբաջյանի մասին, քո յուրաքանչյուր բառն իմ մեջ ավելի ու ավելի ամրացնում էր իմ գաղափարը: Քո մեջ ես տեսնում էի մի հզոր պաշտպանի:

ՎԱՐՍԱՄՅԱՆ. Ապացուցիր, ուրեմն, որ մեր բարոյական աշխարհն ամայի չէ. որ մենք ևս ունենք մարդիկ բառի ընդարձակ նշանակությամբ, գործի և ոչ խոսքի մարդիկ...

ՄԻՅՐԱՆ. Կաշխատեմ:

ՎԱՐՍԱՄՅԱՆ. Դե, թույլ տուր, ուրեմն, սեղմել ձեռքդ իբրև հավատարիմ զինակից: Ես խոստանում եմ հետևել քո օրինակին, եթե իմ կյանքի հանգամանքներն էլ այդպես հյուսվեն: (Սեղմում է ձեռքը): Ցտեսություն, ես հեռանում եմ, որպեսզի այդ տրամադրության մեջ տեսնվես նրա հետ... Ցտեսություն: (Խորքի դռների մոտ դարձյալ սեղմում է նրա ձեռքն և գնում):

ՏԵՍԻՆ 8

ՄԻՅՐԱՆ մենակ, հետո ՄԱՐԹԱ

ՄԻՅՐԱՆ. Ազնիվ տղա, համարում եմ տոլստոյական (Նստում է գրասեղանի մոտ. վերցնում է մի գործ և սկսում է կարդալ: Ձախի դռներից ներս է մտնում Մարթան, և տեսնելով եղբորն, զբաղված, կամացուկ մոտենում է գահավորակի առջև դրած սեղանին և կանգ առնելով նայում նրան վշտակցությամբ: Միհրանը, ըստ երևույթին, կարդում է, բայց միտքը զբաղված է իր վշտով: Մերթ ընդ մերթ նա ցնցվում է: Վերջապես, գործը շարտում է դեն, վեր է կենում և անցուդարձ անում: Հանկարծ նկատելով քրոջը կանգ է առնում): Դարձյալ:

ՄԱՐԹԱ. Այո, և միշտ, քանի որ տանջվում ես:

ՄԻՅՐԱՆ. Ես այլևս չեմ տանջվում:

ՄԱՐԹԱ. Ո՞վ հավատաց: Նայիր հայելուն, տես ի՞նչ էիր և ի՞նչ ես դարձել: Այս երկու շաբաթվա ընթացքում դու տասը տարով ծերացել ես: Դու գիշերները քուն չունիս, ցերեկները հանգիստ:

ՄԻՅՐԱՆ. Լավ կանես, եթե իմ մասին հոգալու փոխարեն, մտածես քո վարմունքի մասին: Դու նրան հալածում ես:

ՄԱՐԹԱ. Ես նրան միայն ասում եմ, ուրիշ կերպ չեմ կարող վարվել մի կնոջ հետ, որ անբախտացրել է իմ միակ եղբորը:

ՄԻՅՐԱՆ. Ասում ես և չես զգում, որ նա ինքն անսահման տանջվում է:

ՄԱՐԹԱ. Երևի խղճի խայթոցից, չէ՞: Եթե նա խիղճ ունենար, քեզ հետ չէր ամուսնանալ...

ՄԻՅՐԱՆ. Մարթա՛...

ՄԱՐԹԱ. Այո, եթե նա խիղճ ունենար քեզ չէր խաբի:

ՄԻՅՐԱՆ. Նա ոչ միայն ինձ չի խաբել, այլև իմ վերաբերմամբ վարվել է ազնվաբար:

ՄԱՐԹԱ. (Դառն հեգնությամբ) Մի՞թե... Ես այն ժամանակ նրան ազնիվ կհամարեի, եթե նա իր խոստովանությունն աներ ամուսնանալուց առաջ:

ՄԻՅՐԱՆ. Այն ժամանակ խոստովանելն այնքան մեծ քաջություն չէր լինիլ, որքան այժմ: Երբ կինը հանուն անկեղծության հրաժարվում է ճաշակված երջանկությունից — հասկանո՞ւմ ես, ճաշակված — նա արժանի է հիացման: Քանի որ նա հարսնացու էր, ինձ չէր սիրում, կարող էր վշտացնել ինձ սառնարյուն: Այն ժամանակ նա չգիտեր ի՞նչ ասել է փոխադարձ սիրո քաղցրություն, իսկ այժմ գիտե: Ահա ինչն էմ ես հերոսություն համարում: Արդյո՞ք, շատերն են ընդունակ այդ տեսակ քայլի, այն էլ մեր կանանցից: Քեզ լավ հայտնի է, որ ես նրան հավատում էի ինչպես սրբուհու: Եվ եթե ամբողջ քաղաքը նրան չարախոսեր — դարձյալ իմ հավատը դեպի նա չէր խախտվիր: Ուրեմն, ինչ դժվարություն կար նրա համար իր անցյալն ինձանից թաքցնելու, եթե չունենար նուրբ խիղճ, ազնիվ հոգի... Եթե չսիրեր ինձ...

ՄԱՐԹԱ. Գեղեցիկ խոսքեր, որոնք պատիվ են բերում միայն քեզ, բայց նրան չեն արդարացնում:

ՄԻՅՐԱՆ. Ոչինչ չի կարող նրան այնպես արդարացնել, որպես հենց իր խոստովանությունը և ոչ ոք չի կարող նրան այնքան խիստ դատապարտել, որքան նա՝ ինքը...

ՄԱՐԹԱ. (Պառլա: Մոտենում է եղբորը): Լսիր, Միհրան. մանուկ հասակից մենք եղել ենք ընկերներ, քո վշտերն և ուրախություններն իմն են եղել, քո անունն ու պատիվը իմն եմ համարել: Մեր ծնողների մահից հետո ես քեզ համար եղել եմ մայր և հայր... Ուսուցչություն անելով, քեզ օգնել եմ, որ բարձրագույն ուսում ստանաս: Ուրեմն ինչպե՞ր կարող եմ սառնորեն վերաբերվել քո ճակատագրին: Ասում ես. «Ներում եմ»: Գուցե, բայց մի՛ մոռանար, որ կա հասարակական կարծիք, բարեկամների թաքուն արհամարհանք, թշնամիների չար ուրախություն: Այս բոլորը դու գուցե սկզբում կարողանաս արհամարհել, բայց հետո, հետո կսկսես ականջ դնել շշուկներին: Եվ այն ժամանակ կատես նրան ավելի, քան կարող էիր ատել այժմ, եթե այդպես չմտածեիր: Ուրեմն, մի՞թե ավելի լավ չէ խնդիրը լուծել հենց այժմ: (Պառլա:): Արձակիր նրան:

ՄԻՅՐԱՆ. Այո՛ է քո բոլոր ասելիքը: Հասարակական կարծիք, բարեկամների արհամարհանք, չգիտեմ էլ ինչ: Մարթա, այդ բոլորից ավելի բարձր ու թանկ է ինձ համար իմ ներքին դատավորի ձայնը: Ես գիտեմ, որ բարոյականի կողմից մեր կյանքի ինը տասներորդականը պատկանում է հասարակությանը, գիտեմ որ կան ավանդություններ, որոնց չի կարելի ոտնատակ անել անպատիժ: Բայց ես ուզում եմ հպատակվել իմ խղճի ձայնին... Իսկ նա, այդ ձայնն ինձ ասում է. «Եվգինեն արժանի է ներման»: Ոչ, այդ ձայնն ավելի է ասում: Նա ասում է. «Եվգինեն բարձր բարոյականության տեր կին է»: (Մարթան ապշած նայում է նրան): Չարմացի՛ր, բայց այս մի այնպիսի համոզմունք է, որին չի կարող խեղդել իմ մեջ ոչ մի հասարակական նախապաշարմունք: (Պառլա:): Միթե ես չգիտեմ, որ ընկերական նիստ ու կացի պայմաններն անհատները չեն ստեղծում: Սակայն անհատները կարող են արհամարհել նրանց և միևնույն անգամ փոփոխել... Ինչ ասել կուզի, ես չեի կամենա, որ նրա անցյալն այդպես լիներ, բայց մտածիր, ո՞վ եմ ես ինքս, ի՞նչ է վերջապես, իմ սեփական անցյալը: Այո, ի՞նչ է: Եթե նա հազիվ պատանեկան հասակում ընկել է մի խաբեբայի թակարդը, ինձ ոչ ոք չի խաբել, ես ինքս եմ խաբել... Այո՛, այո՛, թեև իմ խաբեբայությունն այնքան ստոր չի եղել, որչա՛փ այդ պարոնինը, բայց խաբեբայություն է եղել... Ես ևս մոլորեցրել եմ կանաց... Ինչո՞ւ Եվգինեն ինձ ներել է իմ անցյալի կեղտերը, իսկ ես չպիտի կարողանամ նրա անցյալի ականա սխալը մոռանալ: Եվ ոչ միայն սխալը, այլ թեկուզ կեղտերը, եթե լինեի՞ն կեղտեր...

ՄԱՐԹԱ. Վարսամյանի խոսքերը...

ՄԻՅՐԱՆ. Ա՜հ, այդ խոսքերը ոչ Վարսամյանին են և ոչ իմը: Դրանք խոսքեր չեն, այլ արդար բողոք օրենքի ուժ ստացած անիրավության դեմ... Եվ ես զարմանում եմ, որ դու կանանց իրավունքների պաշտպանդ, ընդդեմ ես մի այդպիսի բողոքի:

ՄԱՐԹԱ. Բայց ես չեմ ուզում, որ բողոքողը իմ եղբայրը լինի: Չեմ ուզում, որ նա լինի դարավոր բերդի դեմ առաջին գնդակ արձակողը:

ՄԻՅՐԱՆ. Եվ ուզում ես, որ նա լինի բարոյական պարագիտ, հոգեկան քաջությունից զուրկ: Ուզում ես, որ նա լինի մեկն այն ողորմելիներից, որոնք ստրկաբար հեծեծում են հասարակական կարծիք ասված բռնության ներքո... Ոչ, ոչ, ես չեմ կամենում և չեմ կարող լինել այդպիսի մարդ...

ՄԱՐԹԱ. (Լռությունից հետո): Այո, տեսնում եմ, որ իմ և քո հայացքների մեջ կա ահագին անդունդ: Այդ անդունդը մենք չենք կարող լցնել վիճաբանությամբ: (Կռվելով ինքն իր հետ պառուզա): Ուրեմն... թող նա բաժանի մեզ...

ՄԻՅՐԱՆ. Մա՛րթա...

ՄԱՐԹԱ. Ինչո՞ւ կեղծել, այդպիսի մի կնոջ հետ ես մի հարկի տակ մնալ չեմ կարող: (Սկսում է արտասվել):

ՄԻՅՐԱՆ. (Գրգռվելով) Մի՛ վիրավորիր նրան, (Ձախ դռների մեջ երևում է Եվգինեն: Նա գունատ է, նիհար, վերջին ժամանակի կրած հոգեկան հուզումներն ու տանջանքները նրա դեմքին տվել են հեգուություն: Նրա աչքերի արտահայտությունը վշտալի է, սակայն հանգիստ: Աչքերի տակ երևում են թեթե կնճիռներ, բայց վիշտը դեմքի գեղեցկությունը նրբացրել է: Մարթան, տեսնելով նրան, շտապով սրբում է իր աչքերն և ատելությամբ լի հայացքը հառում նրա երեսին: Միևնույն Եվգինեն նայում է նրան հանգիստ հայացքով, որի մեջ երևում է նրա հոգու հպարտությունը: Մարթան արագությամբ երեսը դարձնում է նրանից: Եվգինեի դեմքով սահում է մի մեղմ կիսահեգնական և ներողամիտ ժպիտ: (Մարթան քայլերն ուղղում է դեպի խորքի դռները):

ԵՎԳԻՆԵ. (Հանգիստ մի քանի քայլ առաջ է շարժվում): Սպասեցե՛ք:

ՄԱՐԹԱ. (Նայելով նրան անզուսպ ատելությամբ): Ի՞նչ եք կամենում...

ԵՎԳԻՆԵ. Ես ձեզ խնդրում եմ մնալ...

ՄԱՐԹԱ. (Դառն հեգնությամբ և կծու): Մնալ այս օդում.. Այստեղ... ես կխեղդվեմ...

ՄԻՅՐԱՆ. (Դառն հանդիմանությամբ) Մարթա, Մարթա:

ՄԱՐԹԱ. Ես կվերադառնամ միայն քո վերջին վճիռն իմանալու համար: (Գնում է):

ՏԵՍԻՆ 9

ԵՎԳԻՆԵ և ՄԻՅՐԱՆ

Միհրանը մոտենում է լուսամուտին, մի քանի վայրկյան նայում դեպի փողոց մտախոհ, հետո մոտենում է գրասեղանին, նայում ցրված հայացքով թղթերին, ապա նստում է, արմուկները դնում սեղանի եզրին և գլուխը հենում ձեռների ափերին. Եվգինեն մոտենում է գահավորակին և մի ձեռքը հենելով սեղանին, նայում է նրան:

ՄԻՅՐԱՆ. (Բավական երկարատև լռությունից հետո, ձեռները հեռացնում է երեսից, բայց դարձյալ Եվգինեին չի նայում): Ի՞նչ էիր կամենում ասել Մարթային:

ԵՎԳԻՆԵ. Ես ուզում էի խնդրել, որ նա իր եղբորը մենակ չթողնի...

ՄԻՅՐԱՆ. Ի՞նչ է նշանակում այդ:

ԵՎԳԻՆԵ. Այն, որ ինձ համար անհամեմատ ավելի հեշտ է լսել նրա նախատինքները, քան տեսնել քո լուռ տանջանքները...

ՄԻՅՐԱՆ. Ի՞նչ է մնում ինձ անել, եթե ոչ լռել... Իսկ հետո (զգացված ծայրով) մոռանալ...

ԵՎԳԻՆԵ. Մոռանա՞լ... Ռ՛վ կարող է մարդուց անհնարինը պահանջել: Ես այդ մասին չեմ էլ երագում անգամ:

ՄԻՅՐԱՆ. Երբեմն մտածում եմ, արդյո՞ք, ավելի լավ չէր լինի, եթե ոչինչ չիմանայի: Հարյուր բախտավորներից ինսուլինը ապրում է իյուզհայով, թող մեկն էլ ես լինեի...

ԵՎԳԻՆԵ. Եվ ես շարունակեի խաբե՞լ: Տեսնել քեզ երջանիկ և ամեն վայրկյան զգալ, որ դու խավարի մեջ ես, որ քո երջանկությունը հիմնված է մի սիրող կնոջ կեղծիքի վրա: Ո՛չ:

ՄԻՅՐԱՆ. Ճիշտ է, ճիշտ է, ես այդ մասին շատ եմ մտածել: Բայց և այնպես երևակայությունս ամեն վայրկյան պատկերացնում է այդ քստմնելի տեսարանը բոլոր իր մանրամասներով: Գիշեր-ցերեկ իմ աչքերի առջև կան գնած է քեզ մոլորեցնողի կերպարանքը և հալածում է ինձ իր հանդուգն ու լիրբ արհամարհանքով:

ԵՎԳԻՆԵ. Հեշտ չի դիմանալ վիրավորված պատվի զգացմանը...

ՄԻՅՐԱՆ. Պատվի...Ոչ, դու սխալվում ես: Ինչպես դու ինձ հետ եղար անկեղծ, կլինեմ և՛ ես: Իմ պատիվն ես արատավորված չեմ համարում: Սխալը քո անցյալումն է և ոչ ներկայում: Ինձ տանջում է միայն այն միտքը, որ դու երբևէ, թեկուզ մի ժամով, պատկանել ես այդ մարդուն: Դա, իհարկե, նախապաշարմունքն է, այո՛, նախապաշարմունք բայց և... տանջանք... (Վեր է կենում և չափազանց հուզված անցուդարձ անում, մի քանի վայրկյան լռություն): Անցյալ օրն երեկոյան, մենակ նստած այս սեղանի մոտ, թեյ էի խմում, հանկարծ բաժակի մեջ, թեյի երեսին կենդանի նկարվեց նա: Ես խելագարի պես գոռալով ոտքի թռա: Թվաց ինձ, որ նա ծիծաղում է քեզ վրա դիվային ծիծաղով: Ամեն տեղ, ամեն տեղ նրան եմ տեսնում: Նրա ուրվականն ինձ հալածում է գիշեր-ցերեկ: (Պաուզա): Բայց... բայց... ես կազատվեմ, կազատվեմ այս հիմար հալուցինացիայից և կմոռանամ բոլորը: (Ընկղմվում է գահավորակի վրա և ճակատը ձեռներով սեղմում: Պաուզա):

ԵՎԳԻՆԵ. (Դառն տանջանքով) Դու երբեք չես մոռանալ:

ՄԻՅՐԱՆ. (Գլուխն արագորեն բարձրացնելով և ոտքի կանգնելով): Ինչո՞ւ: Միթե ես այնքան անգոր եմ հոգով, թուլամորթ... Եթե ես կարողացա զսպել իմ մեջ նախահայրերիցս ժառանգած ասիականության կոպիտ ոգին, ինչո՞ւ չեմ կարող ավելին անել:

ԵՎԳԻՆԵ. Ինձ համար ավելի լավ կլիներ, եթե չզսպեիր այդ ոգին: Այն թուպին, երբ մթնած աչքերով հարձակվելով ինձ վրա, քիչ էր մնում սպանեիր ինձ, ես երկյուղ չունեի: Մի հարված, և ես կստանայի իմ արժանի վարձը, ու ամեն ինչ կվերջանար, Իսկ ա՛յժմ.. Ոչ, Միհրան, մի՛ խաբիր քեզ: Ներել — գուցե կարողանաս, բայց մոռանալ — երբեք:

ՄԻՅՐԱՆ. Ուրեմն...

ԵՎԳԻՆԵ. Պետք է անել այն, ինչ որ պահանջում է քո քույրը: Ինչո՞ւ կեղծել. ինձ համար ավելի լավ է զրկվել ամեն բանից, քան դառնալ խղճալի: Նա, որ մի ժամանակ ապրել է սիրո շքեղ պալատում, չի կարող կանգնել նույն պալատի դռների մոտ և ողորմություն խնդրել:

ՄԻՅՐԱՆ. Գիտեի, որ հպարտ ես, բայց չգիտեի, որ այդչափ եսամոլ ես:

ԵՎԳԻՆԵ. Եսամո՞լ:

ՄԻՅՐԱՆ. Այո, եսամոլ: Դու այս տնից ուզում ես հեռանալ այն պատճառով, որ չես կարող տեսնել իմ տանջանքները: Դա եսամոլության նուրբ տեսակներից մեկն է:

ԵՎԳԻՆԵ. Թող այդպես լինի: Բայց, հեռանալով այստեղից, կթեթևացնեմ քո տանջանքները: Վիրավորված մարդու ցավը կրկնապատկվում է, երբ նա տեսնում է այն զենքը, որով վիրավորվել է: Միայն իմ բացակայությունը կարող է բուժել քո վերքը...

ՄԻՅՐԱՆ. Այո է, ուրեմն, քո կարծիքով, խնդրի լուծումը:

ԵՎԳԻՆԵ. Ես կարծում եմ, որ ուրիշ ելք չկա: Պետք է բաժանվենք:

ՄԻՅՐԱՆ. Երբե՞ք, երբե՞ք. դու պիտի մնաս իմ տանը հենց ինձ՝ բժշկելու համար: Զո պատիժը դու արդեն ստացել ես, բավական է. մի՞թե ես չգիտեմ ինչ է կատարվում այս րոպեին քո հոգում: Դու պետք է մնաս իմ տանը:

ԵՎԳԻՆԵ. Չեմ կարող... վերջապես իրավունք չունիմ...

ՄԻՅՐԱՆ. Եվ ո՞վ է խլում քեզանից իրավունքը:

ԵՎԳԻՆԵ. Իմ խիղճը — Հավատ՝ա, այդ միակ ելքն է, չկա ուրիշը, չկա: Եթե ես մինչև այսօր հետաձգել եմ, պատճառը մայրս էր: Ես սպասում էի, որ հարվածի ուժը մի փոքրիկ թուլանա Նրա մեջ: Այսօր ես հաջողեցի համոզել Նրան, որ ինձ համար ուրիշ ելք չկա: (Լռություն): Իրեղեններս արդեն կապկապած եմ, մնում է միայն... (ճնշված ձայնով) վերջին անգամ նայել քեզ: (Երեսը դարձնում է Նրանից, որպեսզի արտասուքը թաքցնի):

ՄԻՅՐԱՆ. (Նայում է Նրան համակրությամբ և սիրով լի հայացքով: Նրա դեմքն արտահայտում է ջերմ ցանկություն գրկել ու համբուրել Եվգինեին, բայց ինքնասիրությունը չի թույլ տալիս Նրան այդ անելու: Պաուզա): Բավական է, բավական է:

ԵՎԳԻՆԵ. (Կարճատև, բայց զորեղ պատերազմից հետո, վճռողաբար): Մնաս բարով... միայն... (Տատանվում է), բայց ոչինչ... (Բացասական շարժումն է անում ձեռով և քայլերն ուղղում դեպի ձախ կողմի դռները: Ներսի սենյակից լսվում է դայակի ձայնը, որ օրոր է երգում երեխայի համար: Խորքի դռներում երևում է Մարթան: Լսելով դայակի երգը, Եվգինեն զորեղ ցնցվում է, դողում և հագիվ ոտքի վրա մնալ կարողանալով, հենվում է դռների շրջանակին):

ՄԻՅՐԱՆ. (Նայում է շարունակ Եվգինեին:

ԵՎԳԻՆԵ. (Լռությունից հետո) Ես շատ եմ մտածել Նրա մասին... (Խուլ ձայնով, արտասանելով յուրաքանչյուր բառն առանձին) Նա քեզ է պատկանում... Ես Նրան թողնում եմ, այստեղ:

ՄԱՐԹԱ. Եվ ուրիշ կերպ էլ չի կարող լինել...

ՄԻՅՐԱՆ. (Ցնցվում է քրոջ ձայնից): Ոչ, կարող է լինել... (Մոտենում է Եվգինեին):

ԵՎԳԻՆԵ. (Ուժասպառ ընկնում է Միհրանի գիրկը): Ա՛հ...

ՄԻՅՐԱՆ. (Պաուզա): Մարթա, մոտեցի՛ր... օգնի՛ր.. Եվգինե՛... (Մարթան տեղից չի շարժվում և նայում է Նրանց արհամարհանքով, իսկ երբ Միհրանը գրկում է Եվգինեին, ցնցվում է: Միհրանը հանդարտիկ Եվգինեին նստեցնում է աթոռի վրա, աշխատելով Նրան ուշքի բերել: Ներսի սենյակից տակավին լսվում է դայակի երգը, որ հետզհետե ցածրանալով ընդհատվում է):

ԵՎԳԻՆԵ. (Աչքերը բանալով, նայում է Միհրանին, հետո հանդարտիկ չոքում է Նրա առջև և, վերցնելով Նրա ձեռքը, ամուր սեղմում է շրթունքներին): Չեմ կարող, չեմ կարող...

ՄԻՅՐԱՆ. (Ձեռք խլելով, գրկում է նրա գլուխը: Պառլզա): Համոզմունքով ներեցի, սիրելով կմոռանամ... (Երեսը դարձնելով Մարթային, ձեռով նշան է անում նրան հեռանալու):

ՄԱՐԹԱ. Մոռացիր և ինձ: (Գնում է):

Վարագույր

1901 թ.